

嘉善項氏支譜



上海圖書館

索書號碼 _____

登記號碼 000190



嘉善項氏支譜

三十世孫乃斌輯

第二十三代

孟滔公諱

景瀛公第

子母吳出娶戴氏子三哲士端士英士

謹按孟滔公之滔字向來傳寫多作韜字即僧家鈔送所謂經疏紙者亦作韜字惟往年復見七世祖妣戴太孺人爲三子析產所立分書稱先夫孟滔公云云獨作滔字竊謂戴太孺人乃孟滔公原配析產時親族咸集所立分書或即出親族手筆衆目共觀其無差誤可知又昔年從嘉興宗祠內借得舊鈔本家譜所載自第一代至二十三代止後數代或祇載名號而不詳娶妻某氏或有聘某氏而不詳生有子女若干人者竊意年尙幼小故修譜時未

及載入歟或有未生而無從載入者即孟滔公亦其一也考孟滔公為景瀛公子叙此適當二十三代中載景瀛公子二人一曰浚一曰洵其命名皆從水旁則孟滔公之諱當亦水旁字曰孟滔意義固相應也以此推之當作滔字益無疑義矣今特據此改正附辨於此以質族人

第二十四代

玉音公諱哲士孟滔公長子母戴出娶馮氏子 大賓

德懷公諱端士孟滔公第二子母戴出娶錢氏子二文六上九

軼倫公諱英士孟滔公第三子母戴出娶戴氏子三處士羽清夏鳴

第二十五代

大賓公諱 玉音公 子母馮出娶吳氏繼顧氏子三時霖震方星臺

自小圩裏遷於張涇匯葬四南區小西黃圩楊家橋西

文六公諱 德懷公 子母錢出娶戴氏繼吳氏子四南苞南顯勝南

永元

上九公諱 德懷公 子母錢出娶楊氏子一寧求

處士公諱 軼倫公 子母戴出

羽清公諱 軼倫公 子母戴出娶倪氏子四世百金輿金階中行

夏鳴公諱 軼倫公 子母戴出娶戴氏子二上珍行七

第二十六代

時霖公諱 大賓公長子母 出武庠生娶王氏繼丁氏子二明若伯

松

震方公諱 大賓公第二子母 出娶朱氏子二士倫容照葬小西黃

圩孫家小木橋南

星臺公諱椿大賓公第三子母 出太學生兩淮補用鹽大使娶黃氏

子四邦榮邦翰邦燮邦凝女四長適王修齡次三殤四適沈竹溪葬


父瑩

南苞公諱 文六公長子母 出娶周氏子二詠寧詠昌

南顯公諱 文六公第二子母 出娶王氏子一詠麟

勝南公諱 文六公第三子母 出娶富氏

永元公諱 文六公第四子母 出



寧求公諱 上九公 子母楊出娶陳氏繼陳氏子一惠保

世百公諱 羽清公長子母倪出

金輿公諱 羽清公第二子母倪出娶卓氏子一士源

金階公諱 羽清公第三子母倪出娶胡氏子二士昌五福

中行公諱 羽清公第四子母倪出娶周氏子一士進


上珍公諱 夏鳴公長子母戴出娶張氏子四元龍福山聖山文采

行七公諱 夏鳴公第二子母戴出

第二十七代

明若公諱邦炳時霖公長子母 出娶屠氏子三進修蘭圃德圻

伯松公諱 時霖公第二子母 出早世



士倫公諱 震方公長子母朱出

容照公諱 震方公第二子母朱出太學生娶周氏子六春華桂山蓉


生形洛省齋秋農葬小西黃圩孫家小木橋西

東園公諱邦榮字悅臣星臺公長子母黃出行一太學生乾隆三十五年生道光二十九年卒壽八十歲娶馬氏子 厚齋葬父塋

印珊公諱邦翰星臺公第二子母黃出早世

四香公諱廷燮原諱邦燮字鼎臣星臺公第三子母黃出行五邑庠生娶胡氏繼謝氏又繼周氏子四德鄰義瑄德新德嘉女一適同邑顧太學生候選州同貫珠公諱聯祝葬父塋

湘萍公諱邦凝字襄臣星臺公第四子太學生母黃出行八娶薛氏子



三德修德恒德昭女一適同邑程候補鹽大使國學生作鋒公諱鉞

葬父塋

詠寧公諱南苞公長子母周出娶孫氏子二配京兆王葬小西黃圩

北港

詠昌公諱南苞公第二子母周出

詠麟公諱南顯公子母王出娶沈氏子五福疇配豐三叔順叔傳

叔

惠保公諱寧求公子母陳出

士源公諱金輿公子母卓出娶張氏繼盛氏子壽高

士昌公諱金階公子母胡出娶繆氏子補慶

五福公諱 金階公 子母胡出早世

士進公諱 中行公 子母周出娶朱氏繼王氏子二長慶隆慶

元龍公諱 上珍公長子母張出娶陸氏子五炳泉文標壽林世官行

五

福山公諱 上珍公第二子母張出娶張氏繼盛氏子 桂馨


聖山公諱 上珍公第三子母張出

文采公諱 上珍公第四子母張出娶徐氏繼朱氏子 德林

第二十八代

進修公諱 明若公長子母屠出早世

蘭圃公諱 明若公第二子母屠出早世



珩六公諱德圻明若公第三子母屠出娶邵氏以省齋公子大釗嗣

春華公諱容照公長子母周出行三娶馮氏子二鍾元鍾秀均殤

桂山公諱容照公第二子母周出行四娶陳氏子四大廷大有大鼎

大興女一適同邑姚佩玉

蓉生公諱容照公第三子母周出行五

形洛公諱容照公第四子母周出

省齋公諱容照公第五子母周出行七娶丁氏子三三和大輔大釗

秋農公諱容照公第六子母周出行八葬楊家橋東塋

厚齋公諱東園公長子母馬出行三太學生娶王氏子三鍾勳硯花

叔英葬父塋右


曉山公諱德鄰四香公長子母胡出行一太學生娶孫氏子六鍾英慶
長慶餘慶貴慶壽慶福葬父塋

義瑄公諱 四香公第二子母胡出行二早世

兩村公諱德新字惠疇四香公第三子母胡出行三太學生生於嘉慶
十三年六月初二日未時歿於同治三年正月十三日申時壽五十
七歲娶朱氏繼朱氏子三慶元慶龍慶虎葬父塋

樂齋公諱德嘉字吉孚四香公第四子母謝出行四邑庠生寇亂殉難
賜卹雲騎尉娶胡氏子三慶雲慶霖慶星女三長適顧志棠次適沈
勉庵季適婁縣孫燮夫葬父塋

遜敏公諱德修湘萍公長子母薛出行一太學生娶孫氏以弟月如公



子寶成爲嗣葬父塋

月如公諱德恒湘萍公第二子母薛出行二太學生娶吳氏年二十八稱未亡人撫孤守節三十餘年欽旌節孝載志入祠子三寶康寶成寶賢女一適同邑沈葬父塋

鏡淵公諱德昭湘萍公第三子母薛出行三國學生娶顧氏子三寶樹

寶森寶林女二均殤葬父塋

配京公諱詠寧公子母孫出娶胡氏繼張氏子瑞林

兆王公諱詠寧公子母孫出娶沈氏子三瑞昌瑞高三寶葬小西

黃圩南塘

福疇公諱詠麟公長子母沈出娶張氏子三經世經年經畚

配豐公諱

詠麟公第二子母沈出

三叔公諱

詠麟公第三子母沈出

順叔公諱

詠麟公第四子母沈出

傳叔公諱

詠麟公第五子母沈出

壽高公諱

士源公 子母 出娶金氏子三龍山培觀樂觀

補慶公諱

士昌公 子母 繆出娶李氏子 得鏞

長慶公諱

士進公 子母 出

隆慶公諱


士進公 子母 出娶郁氏子三正國正家樂國

炳泉公諱

元龍公長子母陸出娶張氏子三大寶關通四馥

文標公諱

元龍公第二子母陸出娶吳氏



壽林公諱 元龍公第三子母陸出娶金氏子 嘉生

世官公諱 元龍公第四子母陸出

行五公諱 元龍公第五子母陸出娶胡氏

桂馨公諱 福山公 子母 出娶周氏子二大觀世德

德林公諱 文采公 子母 出娶金氏子二蓮馥蘭森


第二十九代

鍾元公諱 春華公長子母馮出

鍾秀公諱 春華公第二子母馮出

鳴橋公諱大廷桂山公長子母陳出行一

禹薌公諱大有桂山公第二子母陳出行二



定周公諱大鼎桂山公第三子母陳出行四葬楊家橋東塊

振聲公諱大興桂山公第四子母陳出行七娶丁氏民國十一年壬戌

某月日卒年七十九子二金陞乃宣

三和公諱大 省齋公長子母丁出

吉臣公諱大輔省齋公第二子母丁出國學生娶楊氏子一乃安


吉甫公諱大釗號增祥省齋公第三子母丁出嗣珩六公德圻後娶陳

氏繼蔣氏子三乃功乃績乃猷

秋漁公諱鍾勳厚齋公長子母王出行一邑庠生娶朱氏子三倬雲雲

卿思廉葬小西黃圩楊家浜北

硯花公諱 厚齋公第二子母王出行三娶胡氏子三祝林祝春南模



叔英公諱階升厚齋公第三子母王出行六以兄秋漁公第二子雲卿
爲嗣

鍾英公諱慶 曉山公長子母孫出行一

一峯公諱慶長曉山公第二子母孫出行二娶顧氏子二二官祥榮均
殤女二葬楊家橋東塊

公諱慶餘曉山公第三子母孫出

公諱慶貴曉山公第四子母孫出葬楊家橋東塊

公諱慶壽曉山公第五子母孫出

志雲公諱慶福曉山公第六子母孫出行七

子英公諱慶元晚號乾惕居士雨村公長子母前朱出行一邑庠生生

於道光十三年十月廿六日亥時歿於光緒十三年閏四月廿二日
戌時壽五十五歲娶朱氏子三大度乃斌崧生女三長殤次適同邑
黃候選訓導歲貢生孝廉方正慕周公諱中杰子邑庠生諱書城季
適屠邑庠生震甫公諱東昌子邑庠生諱垂芬

又村公諱慶龍雨村公第二子母後朱出行二生於道光二十五年六
月廿九日申時歿於光緒二十一年七月廿一日辰時壽五十一歲
娶陶氏子二乃賡乃芬女五長適同邑屠候選直隸州同知濱樵公
諱慶泗子邑庠生諱士芬次適曹國學生履雲公諱子從九品名
錫庚三四均殤五適陶候選中書科中書又鈞公諱鼎彪子邑庠生
諱大榮

行三公諱慶虎雨村公第三子母後朱出早世

瑞書公諱慶雲樂齋公長子母胡出行二積學早世葬父塋西

笠夫公諱慶霖樂齋公第二子母胡出行三生於道光二十七年十二

月初四日寅時歿於光緒廿九年十月初十日巳時年五十七歲娶

趙氏子三乃昇乃琛乃徵女五長適同邑錢國學生諱斐然次適朱

諱世熊三適余名樹業四適王諱侍潭五適陳名漢才葬父塋西

長庚公諱慶星樂齋公第三子母胡出行四早世葬父塋西

行一公諱寶康月如公長子母吳出早世


石華公諱寶成月如公第二子母吳出行二嗣伯遜敏公後國學生娶

陸氏子三桐孫馥孫乃登女一玉禎幼殤

先考事略

男乃登謹述

先考諱寶成字石華月如公第二子出嗣遜敏公後延師課於家未及試而劫至亂離之際先妣陸太淑人來歸是時室廬灰燼積泉蕩然先考張羅薄貲營商餬口復折本攜眷城居（故宅在張涇匯寇平先祖妣吳太夫人重構數楹聊蔽風雨先考讓先三叔父慎庭公居之）遇許紳經邦邀至其家主計出納忠於所託絲毫不苟賓主極相得暇則披覽方書潛心研究數十年不倦出其心得與諸醫辯論咸擣舌不能駁親友之病者請療治未肯輕試再三請爲投方藥輒見奇效勸之懸壺曰古者醫不三世不服其藥余非知醫何敢牟利而殺人也饋遺悉無所受恒以早失怙爲憾事母孝待弟厚取友端




見士敬若顧紫珊張少泉輩諸名流時相往來談今論古鄰里有爭訟者片語解紛判斷曲直罔不心服亦不議論人長短鄉之中稱長者焉嘗語乃登曰汝姊玉禎汝兄桐孫馥孫均早夭汝又多病瀕於危者屢倚藉列祖之靈得以成立留一讀書種子余心慰矣幸而得志毋驕奢而喪德不得志毋憂戚而變節勉旃勉旃戊子以後疊遭大故先考忽忽不怡癸巳乃登游郡庠乙未食廩餼丁酉秋闈鄉先達索觀文藝擊節歎賞先考始色然喜詎是歲八月終先考猝得病病屢變醫屢易俱術窮而無功歿于翌年七月伏念先考勤勞畢世未受乃登一日之養終天之憾豈有涯哉先考性伉爽視人事如己事馭下寬而有禮不苛察不偏倚不較錙銖囊橐蕭條處之安然身

歿而舊交感懷不置且有泣下者禮曰先祖無美而稱之是誣也有善而勿知不明也故據實而謹書之以示後昆

先妣事略

男乃登謹述

善邑陸氏爲宣公嫡裔世居石馬灘其地踞城之東隅又東去縣治約七八里有陸莊莊有宣公祠春秋祀焉紅羊未劫陸氏甚盛自遭兵燹零落殆盡先妣卽於是時歸我先府君夙夜操作勤勞備至日以甘旨奉其姑且能曲體其意城居後時饋鮮美之物博堂上歡先祖妣賢之壬申生乃登推燥就濕捧負提攜心力瘁而病以伏乃登因乏乳之故而病亦萌母子相繼病先府君之憂愁困苦固不可以言喻矣祖姑母程太安人聞訊遠來承問留居半載殫心調護爾時乃



登過幼不知母病之若何己病之若何更不知家况之若何比稍長
聞先府君與先妣言之而始能記憶且憶十齡前後外祖母薛太宜
人尙在撫摩而告之曰汝外祖父歿於亂汝諸舅父流離四方依我
膝下者惟汝大舅母及汝大表兄耳昔之廣廈崇宏奴僕十餘輩骨
肉聚居歡聲達戶今乃賃屋而居淒涼若此汝家亦何獨不然也嗚
咽不止先妣在側掩淚而慰之曰繼承先烈恢復舊觀若後人賢達
亦不難也於是期望益切積緘菑之資以助修膳屬從名師遊戊子
先妣舊疾復作卒以不起先府君扼腕曰汝母賢而多惠貧而無怨
勤而不怠儉而中禮今忽大去嗚呼已矣余無助汝無母將奈何乃
登聞言悲痛不能仰視伏而記之不禁涕隨筆下也

清贈文林郎江蘇補用知縣項公墓誌銘

同縣世愚姪孫乃炤頓首拜撰

公諱寶成字石華姓項氏浙江嘉善人也先世居洛陽爲漢司徒萬金之後建炎南渡大理寺評事晉盡室扈從遂家秀州之胥山鄉元改秀州爲嘉興明又析胥山鄉隸嘉善枝分葉布子姓蕃衍科名仕宦後先輝映而家規嚴肅世又以孝友著稱至明兵部尙書諡襄毅耆年碩德尤負海內重望及其子與孫曾四世皆成進士官禁近實嘉善項氏分支始祖也曾祖諱星臺祖諱邦翰本身祖諱邦凝考諱德修本身考諱德恒並戢曜崧跡能世其德公承明達之後稟淳和之質幼遭粵匪禍亂舊業蕩然乃輟學就商艱苦治生暇輒讀書爲樂

洞明經史大義於經脈藥石之書尤多心得特慎其術不以售世而偶一試治輒有奇效故求治者戶外之屨恒滿絕不受酬與人交少長貴賤咸得歡心人有爭執片言排解罔不折服嘗爲邑故家司出納纖細無苟主賓誠浹終身以早失所怙爲憾事母孝而待弟厚睦嫻任卹宗族無間言鄉黨稱長者焉生於道光壬寅十一月十六日卒於光緒戊戌七月十六日春秋五十有七夫人陸氏先公卒民國紀元八年己未三月合葬於治東九南小收圩沈家灣之新阡生女一居長曰玉禎子三桐孫馥孫均幼殤季子曰乃登郡廩生宣統己酉選拔貢生庚戌朝考一等江蘇補用知縣公例得贈如其官乃炤於公爲鄉里後進獲見其丰采習聞其言行又與公之季子爲總角

交共和以來同游京師臺省耳季子名交相徵辟第用文字爲周旋
清介自持無有所唯阿胥以儒士重之抑知季子在鄉勇於公義扶
弱抑強急人急如己急一矯書生姝暖之態蓋儒而俠者是皆秉公
之教而推之彌遠已爰爲辭以銘銘曰

於休我公允矣君子雍穆庭闈敬恭桑梓錫類推仁貽謀介祉十室
忠信一鄉善士我銘幽宮高山仰止

吳縣陸相國潤庠題贊

庚戌

瞻彼武塘蒹葭蒼蒼有一善士信孚於鄉雛鳳豐羽伫望高翔悠悠
泉臺闡其幽光

螺江陳太傅寶琛題贊

甲寅

石氏風鄭氏範燕翼貽謀家聲不墜

慎庭公諱寶賢月如公第三子母吳出行三娶姚氏子二大觀乃昌葬

楊家橋東塋

期服胞兄寶成哭輓

自鼎革迄今越二百年吾家昆弟無多半讀半耕門祚久衰難復振
爾鄉間來此亦四五載（先母故後弟應孫氏之聘來城）病榻情
懷彌篤相憐相惜鴈行忽散不勝悲

公諱寶樹鏡淵公長子母顧出早世

守誠公諱寶森鏡淵公第二子母顧出早世葬楊家橋東塋

鳴和公諱寶鈴原諱寶林鏡淵公第三子母顧出行四娶吳氏子一金

鏞葬楊家橋東塊

瑞林公諱 配京公 子母 出行四娶沈氏繼高氏又繼金氏子二

關福叙勳

瑞閻公諱 兆王公長子母沈出娶胡氏子四貴生貴三金福寅清葬

小西黃圩北港


瑞高公諱 又字六壽兆王公第二子母沈出娶馬氏以兄瑞閻公第

三子寅清嗣葬父塋

三寶公諱 兆王公第三子母沈出

經世公諱 福疇公長子母張出行 娶 氏

經年公諱 福疇公第二子母張出



經畚公諱

福疇公第三子母張出行

娶王氏子四潤身潤口潤芳

潤口

龍山公諱

壽高公

子母金出娶錢氏子二潤元二觀

得鏞公諱

補慶公

子母李出

正國公諱

隆慶公長子母郁出行三

正家公諱進發隆慶公第二子母郁出行四娶朱氏

樂觀公諱

隆慶公第三子母郁出行六

大寶公諱


炳泉公長子母張出娶元氏

關通公諱

炳泉公第二子母張出

四馥公諱

炳泉公第三子母張出娶吳氏繼郁氏子四杜觀增福老



富得壽

嘉生公諱 壽林公 子母金出娶朱氏子二順福六官

世德公諱 桂馨公 子母周出娶張氏子二大冠金鎔

蓮馥公諱 德林公長子母金出

蘭森公諱 德林公第二子母金出


第三十代

乃 字金陞大興公長子母丁出行二早世

乃宣字仲揚號錫康大興公第二子母丁出行三娶錢氏繼口氏

乃安字維楨大輔公 子母楊出行二國學生娶孫氏子二開文開章

乃功字芸青大釗公長子母陳出行一娶戚氏子五開字開本開泰開



業開俊女一適

乃績字少坪大釗公第二子母蔣出行二娶蔣氏繼李氏子三開祥開

禧開口

乃猷字錦文大釗公第三子母蔣出行四娶張氏

漢字倬雲鍾勳公長子母朱出行三


江字雲卿鍾勳公第二子母朱出行五葬楊家橋東塊

河字思廉鍾勳公第三子母朱出行八葬楊家橋東塊

字祝林硯花公長子母胡出行一

字祝春硯花公第二子母胡出行三

字南模硯花公第三子母胡出行 壬戌殉難有傳



大度字 慶元公長子母朱出行一早世

乃斌字季潛一字際才號霽湘又號蘭石慶元公第二子母朱出行三
邑增生生於同治三年十一月初四日丑時歿於民國十三年九
月初九日卯時壽六十一歲娶葉氏妾姚氏子一開時

顯考際才府君行述


府君諱乃斌字季潛一字際才生值洪楊劫後屋宇器具悉爲灰燼

先王母父極力摒擋築數椽以蔽風雨半村半郭絃誦之聲勿輟 府

君幼穎悟過目成誦隻字不遺舞勺之年羣經畢業 先王父感家

道中落命改習商而 府君握算之餘披覽典籍昕夕不倦 先王

父見其狀心竊喜謂立志如是書香勿替矣令從同邑黃徵君中杰



遊作文思如泉湧每一藝出徵君擊節歎賞光緒乙酉應童子試以第一名入泮受知於劉公廷枚稱爲遠到才迫於家計設帳授徒束脩之入奉堂上甘旨是年十一月家慈葉氏來歸荆釵布裙親操井臼善事翁姑府君無內顧憂益矢力於學丁亥閏四月先王父子英公棄養泣血三年未嘗見齒辛卯七月府君赴省應秋試未終場先王母病篤之耗至八月初四日匆促歸家而先王母朱太孺人於初五日逝世府君猝遭大故一慟暈絕移時始蘇涕泣而呼曰哀哀父母生我劬勞罔極深恩涓埃未報不可以爲人不可以爲子從此絕意進取往來墓門獻歎不置先是先伯父大度公先叔父崧生公均早世先王父有哭子詩數章府君珍之

若拱璧而先叔父尤慧四歲能誦千字文琅琅上口不稍停滯應

對亦極敏捷府君時爲不孝言之猶不勝痛惜也甲午十月五

姑母適同邑邑庠生黃公書城丁酉十月六姑母適同邑邑庠生

屠公宏模府君措辦妝奩備極艱辛且連遭先王母暨先曾

繼妣朱太孺人之喪入不敷出全恃硯田以資炊爨泊先曾繼妣

服闕後應當湖沈氏聘館穀較豐旋膺孫公家瑚之聘赴安徽黟縣

任所課其子弟兼襄文牘府君秉燭辦公不辭勞瘁公餘出外搜

覓坊間古籍積書盈箱此外別無長物及至孫公解職相與旋里甲

辰八月庶母姚氏來歸時本邑開化典業孟晉各學堂相繼設辦

敦請府君擔任教務戊戌以還新學競起府君於經史之外並

研究各國時務新學宣統己酉五月不孝生庚戌十月鄉議會成立
被選爲張匯鄉議員復公舉爲議長民國元年壬子三月被選爲縣
議會議員凡所建白動關大計二年癸丑春 府君與陳丈申曦屠
君仁志等創辦時敏初等小學於張匯鄉之南市是年冬縣知事祝
委充本區自治委員繼又奉委兼充本區學董四年乙卯八月與徐
君爾塘創辦贊化初等小學校於九曲里 府君樂育數十年而成
材以去者不可勝數他若代賒平糶築堤修路除螟蟲放農米等諸
義舉無不竭力贊助 府君體氣素強性尤伉爽凡遇鄉里爭鬪勢
將涉訟必爲之陳利害評曲直平允無偏人咸感服相讓以去非公
事不入公門不喜面諛不受私餽所與交者皆一時知名之士四十

以後好古愈篤遇有罕見之書愛不釋手非借鈔即不惜重貲購之
藏書二千餘種間多佚本分類編目命從兄開先錄正嘗謂我家天
籟閣藏書之富甲於天下奈滄桑世變文獻就湮迄今二百餘年餘
韻歇絕誠大可痛事由是周諮博訪刻意搜求積數十寒暑纂成嘉
禾項氏清芬錄若干卷又嘗抵禾從吾宗耆老訪求先代故實僅得
鈔本舊譜於遷善一支未經載入乃因流溯源輯成項氏支譜自清
初二十三世起至見代三十一世止又輯魏塘文繫其餘著述散失
過半五旬以外漸呈衰象面龐消瘦目力益弱然猶日手一編殫心
攷校每謂不孝曰學無止境他日有成毋以自封汝其識之 府君
一生節儉不重肉不衣帛而待人甚厚八年己未三月與 二叔父

乃賡安葬先人遺柩於四南區西黃圩楊家橋西塊十二年癸亥夏
會同城紳募修華亭塘親自督視閱九月始竣時正 府君六十初
度戚友咸擬稱慶 府君以年歲凶荒物力維艱虛事鋪張適以滋
愧且余一韋布老書生耳上未能顯親揚名下未能詒謀燕翼何壽
之可言堅辭乃止十三年秋江浙戰事起民不甯居謠詠繁興一夕
數驚 家慈等恐 府君年邁不能安寐數請暫避 府君笑置之
態度鎮靜未幾烽火蔓延逼近眉睫 五六兩姑母亦先後敦促始
於八月廿六日挈 不孝 遷避鍾溪忽兩手微腫夜發熱 家慈聞訊
由里往省不一日腫至臂兩股亦稍麻木兼咳喉漸癰醫治罔效臨
終屬 不孝 以讀書敦品爲事語不及私又詔從兄開先曰時氛不靖

屋廬貲財余勿惜惟清芬錄及魏塘文繫襄毅公年譜實紀家乘等
數十年心血所寄設有散失爲最可惜汝其爲我善護之 府君生
於清同治三年甲子十一月初四日丑時卒於民國十三年甲子夏
正九月初九日卯時享壽六十有一歲

棘人項開時泣血稽顙謹述

鄉世愚弟錢駿祥載拜填諱

像贊

一鄉善士志潔行修左淫杜癖宛委窮搜胸有千秋目睨五洲功名
敝屣隱於郊陬歸真返璞管邴之儔

高爾登敬題

勿與人爭利勿與世爭名藹然儒者抱道守貞濟濟生徒執贄盈庭
勤旁搜而遠紹纂天籟之清芬見義勇爲彥芳揚聲合稱祭酒粉社
垂型

總服弟乃登拭淚拜題

自治屈槃材百事賢勞有造維桑踰十載
登高返蓬島一年容易又歌廣柳展重陽

陸炳琦拜輓

耆舊重儒林學府高占推祭酒
收藏繼天籟書城坐擁傲侯封

牛蔭麀敬輓

藏萬卷書遺響如聞天籟閣
界六旬壽悲風猶咽浙江潮

世弟徐士燾頓首拜輓


藏書數萬卷讀書數千卷博古通今先生無愧
曾任區代表復任縣代表急公好義衆望允孚

嘉善縣議會敬輓

天籟嗣遺音當世竟成絕響
年華嗟逝水在山可是清流

姍弟王承烈頓首拜輓

嘉禾舊德墜緒堪尋天籟閣遺響如聞繼志誦清芬叢殘滿架著作



等身况夫道範咸欽卓卓一鄉推祭酒

先祖新喪銜哀正切黃歇浦狂潮忽起攜家避戰禍共濟同舟相依
爲命何竟鞠凶疊降熒熒隻影哭州門

在制功服甥黃振鈺甥孫承泗沂全拭淚拜輓


鄉議長縣議員建白動關大計

創學校任學董栽培幾許後生

世姪吳以膺謹輓

十餘年枋社宣勞事求是學求新美德請題歸善里
重九後菊觴晉奠言可師行可法典型永仰老成人

張匯區自治辦公處謹輓



泮水冠羣英宿學新知口澤旁敷留手澤
議壇排衆論興利除弊世情洞見達民情

世姪葉錦文拜輓


一卷誦清芬問字析疑卅載春秋還似昨
重陽聞惡耗去年今日兩番風雨更淒其

韓容彥拜輓

舊學共商量曾記鱗鴻勞折簡
修文今赴召那堪風鶴警歸魂

郁世烈拜輓

錄纂清芬著作名山堪壽世



時遭離亂倉皇避地遽捐生

世愚弟顧

振庠勝祥

仝頓首拜輓

天籟紹先芬文獻徵存著述等身孚碩望
師資式後進梓桑恭敬熱誠興學仰蕭規

張匯第一小學校謹輓


講席共君分風雨雞鳴縈昔夢

楹書留子讀簡編蛾術紹清芬

沈龜周濟

仝頓首拜輓

昔譚經濟文章明德親民期至善
今說莊嚴世界花開見佛悟無生



汪憲章敬輓

先生推當代經師往日從游猶憶雅言銘座右
後起有讀書種子清芬不散長留天籟在人間

門人張寶書頓首拜輓

教育具精神培植青年爲國用
時艱空擔荷杳冥蒼昊妬公才


世弟王國

榮勳全拜輓

考獻徵文流傳千古

守貞抱璞望重一鄉

楊鳳鳴拜輓



襟懷澹泊學問淵深畢世勵清操鄉里咸稱古君子
烽火頻驚膏肓遽崇重陽傳噩耗儒林頓失老成人

愚弟曹善

均達

全頓首拜輓

枌榆墜緒天籟殘書畢生心血搜求祇此已成千秋業
重九剛臨萬方多難一旦棟梁摧折奚堪再讀渭陽詩

功服甥屠元

熙熙

甥孫


基培

全拭淚拜輓

由來新舊稱先覺
從此鄉邦失導師

世姪張福奎敬輓

滄桑無定局從數百年後每歎天籟圖書銷沉已久門祚感衰微風



雨一廬阿兄獨纂清芬集

刁斗近重圍適八九月間深恐潢池烽火延蔓何堪塵凡尋擺脫山川千里使我徒留老病身

總服弟乃登姪開驢姪孫棣生全拭淚拜輓


崧生字 慶元公第三子母朱出行四生於同治八年五月初四日

子時殤於同治十一年三月初六日寅時童年四歲

乃賡字根華慶龍公長子母陶出行二國學生娶陳氏子三開先開宗開運女三長適同邑王優廩生味青公名頤壽子名昌騏次殤三待

字

乃芬字漱蘭一字守梅慶龍公第二子母陶出行七娶徐氏



乃昇字詒孫一字麗初慶霖公長子母趙出行四自治研究所畢業娶

徐氏以弟乃琛子開不爲嗣葬父塋

乃琛字錫侯慶霖公第二子母趙出行七娶陳氏子開不開汲女

國英待字

乃徵字鶴軒慶霖公第三子母趙出行九聘黃氏娶周氏子開寅開

基開能

乃字桐孫寶成公長子母陸出行二幼殤

乃字馥孫寶成公第二子母陸出行三幼殤

乃登字農若號琴莊四十後號毋意又號息園寶成公第三子母陸出行四郡廩生宣統元年己酉拔貢庚戌朝考一等保和殿覆試欽取

二等吏部籤分江蘇補用知縣江蘇省視學員秋審委員辛亥八月
請假回籍公舉保安科科員民團副團長縣議會議員城區學董衆
議員選舉初選當選省委本縣清鄉助理員浙江省長屈保送考驗
知事北京司法官懲戒委員會第一科主任事務員薦任職任用給
予五等嘉禾章晉給四等嘉禾章全國鐵路協會編輯部幹事京畿
衛戍總司令部諮議秘書上行走國務院簡任職存記國務院清理
欠薪處委員晉給三等嘉禾章內務府旗產清理處秘書京兆全區
清理官產處顧問辦理秘書事宜著有殼鯨紀聞聯珠吟息園詠物
小天籟閣詩文存燕夢草宜櫺集燕都竹枝詞南行草息影集詠重
陽集咫聞齋隨筆娶曹氏子五開騏開駿開驊開驥女二長梅

先適同邑沈附貢生候選訓導少山公諱口口子邑庠生縣立第三
高小學校校長國務院印鑄局辦事主事待遇浙江教育廳科員名
學洙次全貞六歲殤

朝考閱卷大臣

吏部尚書李殿林學部尚書唐景崇理藩部尚書宗室壽耆學部左侍郎

宗室寶熙署法部右侍郎王疇侍郎南書房行走張亨嘉大理院正

卿定成內閣學士陳寶琛

欽取一等第十四名

保和殿覆試閱卷大臣

體仁閣大學士陸潤庠都察院都御史張應麟軍機大臣吳郁生吏

部左侍郎于式枚禮部左侍郎郭曾忻法部左侍郎紹昌廂黃旗滿


洲副都統秦佩章廂白旗漢軍副都統顧潢內閣學士楊內閣

學士李內閣學士室宗毓賢宗人府府丞朱益藩

欽定二等第三名

諸葛亮理民之幹優於將略論此題係 御筆親書餘不錄

夷吾佐齊作內政寄軍令據表海之雄臨制諸侯其勢易子產相鄭以彈丸之地介於大國安衆志禦外侮其勢難若夫處至難之勢崎嶇立國南越撫其背吳魏抗其前而能翊贊宗傑經緯萬端興微繼絕鼎足三分則非有資兼文武內可相而外可將如諸葛亮者焉足俾區區之蜀安固西陲哉以是論之脫令管僑處此恐亦無以過亮




也乃陳壽謂其理民之幹優於將略則曷以故蓋晉承魏祚壽爲晉臣當日司馬宣王受魏主命與諸葛相見於疆場而恒畏之如虎欲揚諸葛氏之長則適形司馬氏之短故微貶其將略然壽又謂衆寡不侔攻守異體時之名將無城父韓信故使功業陵遲其推崇諸葛許以將畧之意已隱露於言外矣不然即宣王按行其營壘何以歎爲天下奇才乎夫諸葛之治國也庶事精練循名責實吏不容奸人懷自厲道无拾遺疆无侵弱政績炳然彰彰在人耳目間固無煩置辯矣獨至用兵私家著錄較壽爲確凡壽所顧忌而不書者私家悉實書之偉哉臥龍應機決策料敵如神三國時之英雄豪傑誰與頡頑縱箕谷不戒街亭違命豈咎由諸葛耶節制之師不爲僥倖胡氏

之論蓋得其旨矣世有諸葛者乎余雖爲之執鞭所忻慕焉

書示致兒芝兒

父少小多病累汝 先祖考妣憂勞罪甚罪甚七歲從孫師蔚卿八歲從蔡師省三九歲從金師慰農十二歲從德清談硯香姨丈顧時以病廢讀但悟性尙佳每作文字鄉先達見之輒加稱賞詩之進步速於八股賦則私自研究一日以柳州亭落成賦呈師師曰若作耶曰是師大喜畧改三字批極獎勵嘗謂友曰此子翰苑才也丁亥汝祖妣歿翌年秋汝 祖考抑鬱成疾連年多故一無蓄積幸葉清泉孫松巖兩世伯竭力安慰有無可通得以調養痊復重以汝 曾祖妣及先三叔祖慎庭公不數年間相繼作古醫藥喪葬之費益加



負擔收入微薄無以彌補是以肝火時熾庚寅父適館許氏館穀所
入藉資貼補是冬汝 祖妣撤靈辛卯三月父成婚壬辰三月開騏
生癸巳二月應縣試邑侯江峯青拔取第一名府試（知府宗培）
院試（文宗陳彝）均列前茅撥入府庠入泮後以詩賦呈江侯奉
復云賦有文選筆意謀篇布局井井有條述懷詩語意樸茂風骨遒
勁其間見道之言尤足欽佩惟少年英銳不應多作牢騷語王子安
滕王閣序賈長沙治安策均不似少年文字戒之是年八月大病諸
醫棘手六十日饘粥不進日沉一日自知不起一夕忽聞異香由鼻
直貫而下胸膈乃通由此漸漸而愈（詳病中記）甲午科試徐致
祥宗師按臨古學正取闔屬第一名虛名達於七縣見者相敬平川

金振卿前輩甚至倩陳君喬生爲介操舟來訪是年十月女梅先生
乙未補廩遠方來聘汝 祖考不令行迺與許石渠張時升李蘊甫
孫錦裳陳瑞清傅夢岩徐萬石陳葵生顧友笙李衡峯孫蔭庭周正
畦唐伯崧等結文社又與毛少春陳喬生孫履安先家兄際才等結
賦社且與生徒改文及朔望書院課卷每期多作用心愈甚而體愈
弱夜不能寐盜汗喘咳吐痰兩罐舌無津液幾成癆瘵然意氣猶豪
絕不以病自慮丁酉秋闈三場文藝顧紫珊黃慕周孫仲山夏曉巖
陸秋萼諸先生索閱稿俱擊節汝 祖考有喜色詎八月杪旅中得
病百端醫治病象屢變後成鶴膝風便溺須人扶持汝母與女僕似
有未便父負之上下且家用藥費日夜籌畫自身之病全然忘卻惟

覺胸部常有血腥之氣衝上應節而發戊戌正月汝母難產極險嬰
兒墮地已死名曰開駿七月汝 祖考棄養衣衾棺槨等種種悉由
借貸以辦大事臘月除夕索債者紛至父與情商分期歸楚各允諾
而去己亥三月開驛生冬初遷居政和橋東坨迤南邸宅庚子正月
同縣張氏來聘冬至汝 祖考撤靈辛丑六月祁兒患病甚重府學
教授章椿伯師保送考優不應試七月祁兒病稍愈友堅約同赴秋
闈是科初改策論二場甫畢忽接緊信梅先女熱閉不省人事八月
十五日終場急還里見狀似已無可挽回諸醫診斷發疹藥劑無效
父與錢丈觀石議非扶元氣疹不外透決用參湯醫不謂然而竟以
此轉機癸卯正月開驢生二月新任縣學教諭楊觀風取第一名擬

保送高才生未果楊去任七月友又約赴秋闈三十日午後狂風暴雨貢院前旗桿摧折數段考棚一卷而空先時南京貢院天開文運額墜落於地識者知爲不祥是科以後而科舉廢矣（以後祇有優拔兩科）甲辰正月應同邑孫氏聘乙巳二月六女全貞生冬汝母病府學教授章保送考優不應試父因汝母病七年之久精神與經濟兩者俱消耗甚重丙午正月汝先三叔祖母姚氏卒三月祁兒至亭林習典業戊申四月祁兒調閔行因病還家調養不久即愈是年全貞女殤己酉春新任府學教授賀保送考拔父盪經磨折功名兩字早已灰心補廩十五年本年例應出貢擬婉辭奈賀師之意甚殷朋儕之勸甚力所以嘉興府（知府英霖）起文保結等父概不問六

月赴杭頭二場提學使支（恒榮）督考三場覆試巡撫增（韞）督考父隨筆抒寫不求勝而獲選前此四屆鄉試力求勝而未中得失殆有一定歟十月二十日開賀遠近來者三百餘人午刻設席有十餘知己而豪飲者搢戰行令直至丑正各酩酊不堪矣庚戌三月三日

至四月十日親友連日餞飲臨行賦詩留別諸前輩誦至收句此去三千雲路遠大羅竊聽羽衣聲曰必得捷報十二日赴滬乘輪渡海

（津浦路未築）至天津轉乘火車晉都與陸頌襄盛味根陸平之

朱賓初諸同年寓嘉興會館五月廿六日朝考六月六日保和殿覆試頌襄用七品小京官父與味根等俱用知縣嘉府旅京同鄉謂歷科未有如是之盛稱爲五虎將（寓會館外者尙有金友之葛詠梧

周禕侯張處方沈德良諸君亦皆以京官與知縣用）由是分日參拜各座閱卷老師并假全浙會館公宴各師又照例拜謁同鄉京官酬酢往來日日不得清靜七月疊接家報祁兒咯血不止父事未了欲歸不能心頗焦灼是月吏部籤分江蘇補用八月六日禮部演習十日帶領引見十八日領憑即由京南下廿四日抵家廿七日祁兒歿而汝母仍臥病未起內事一切悉汝二姊主持十月到蘇繳憑稟到巡撫程（德全）藩司陸（鍾琦）提法司左（孝同）提學司樊（恭煦）俱蒙特別垂詢屬令靜候差委（是時稟見禮節不用叩頭祇打兩拱上司答禮對上不稱卑職自稱知縣）辛亥四月樊提學委省視學員奉到閩浙總督（松壽）批回部憑已繳部註冊

(吏部憑照由蘇撫咨送閩浙大吏繳呈吏部此憑極關重要) 七月江甯藩司樊 (增祥) 札調赴甯八月左提法委秋審委員時適還里措資未逾旬而武昌起事九月風聲益緊在籍與商會總理朱循柏同年及徐郇叔孫錦裳陳瑞清錢瀛洲孫彥濟陳濟才孫蔭庭趙曉因唐伯崧陳純仁朱伏陽各紳創辦民團公推副團長循柏爲正團長復先組織保安科錦裳爲科長壬子民國元年二月汝母病痊遷居對河天水衝南口孫宅民團撤局 (詳民團記) 浙江都督朱 (瑞) 委本縣清鄉助理員六月清鄉告竣赴省銷差政務廳長虞柏履轉達朱督意擬畀縣缺謝以才不勝任縣議會成立公舉議員并被選第一屆初選當選衆議員到杭複選人謂若費三千金票

投若笑應之曰果有三千金作三徑資矣癸丑民國二年一月縣校聘任教員以陳校長袁知事（慶萱）情不可卻擔任三月轉薦陳君葵生嗣本縣小學教員養成所成立來聘亦允擔任三月爲限五月開驥生七月教育會推舉城區學董由縣照會時父意欲遠行力辭之并辭孫氏館十二月以城河奇涸舟楫不通創議開濬各紳贊助不半月而集事（有濬河記）甲寅民國三年二月北京友人函招因事未往三月浙江省長屈（映光）保送考驗知事暇與藝社梯園同人唱和北京財政講習所最優等畢業財政部備案乙卯民國四年十一月政事堂右丞兼平政院院長錢（能訓）奉大總統令開辦司法官懲戒委員會委任第一科主任事務員是年梅先二

女遣嫁丙辰民國五年二月奉大總統令叙列中士三月昌兒病丁巳民國六年二月昌兒卒父料理喪事後携致兒到北京戊午民國七年十月祁兒陰娶陳氏昌兒陰娶沈氏循俗例也十一月蒙平政院院長兼司法官懲戒委員會委員長夏（壽康）保准薦任職升用己未民國八年一月奉大總統令給予五等嘉禾章三月葬汝先曾祖考妣於涇張匯南之楊橋葬汝先祖考妣及先兄開騏開驊等於沈家灣五月杪挈眷到天津適有軍事路阻六月二十日到北京寓東城詔九胡同十一月遷西城靈境八寶坑庚申民國九年八月遷三道柵欄九月中華全國鐵路協會正會長葉（恭綽）副會長關（賡麟）派充編輯部幹事辛酉民國十年二月奉令晉給四等

嘉禾章五月父病六月上旬偕致兒還里結婚七月下旬與致兒儀
媳北上途中又病壬戌民國十一年五月中華匯業銀行延聘教授
行員國文九月奉令晉給三等嘉禾章京畿衛戍總司令部總司令
王（懷慶）派充諮議秘書上行走旋以保衛京畿異常出力案內
特保簡任職癸亥民國十二年三月奉大總統令准交國務院存記
並咨內務部陸軍部註冊四月汝姊偕沈姊夫一峯來京八月兼充
國務院清理欠薪處委員甲子民國十三年四月新亨銀行聘任祕
書是年十一月段執政當國乙丑民國十四年五月孫中山總理薨
於協和醫院殯於碧雲寺追悼於中央公園三次奉派致祭丁卯民
國十六年四月任內務府旗產清理處祕書六月兼京兆全區清理

官產處顧問辦理祕書事宜八月大元帥張（作霖）令所有旗產官產處撤消另組織全國清理處辦理會辦趙鳳侶仍來邀與共事而父尚有楊錢二館及司法懲戒會事請緩再商九月梅先女偕一峯南行繼而致兒偕儀媳亦行當民四時洪憲發生籌安會再三羅致父不爲用民十後橫濱總領事周珏洛陽吳孚威將軍戎幕山海關路局及大連趙公子先後相約亦均未赴戊辰民國十七年二月遷關才胡同內羅圈胡同四月天津交通銀行楊行長蔭蓀函招襄理文牘甫及兩月而北京政變（北京改稱北平）戰地委員來訪父已在津已巳民國十八年七月送汝母及虎孫還南芝兒仍留平學校肄業辛未二十年汝母大病幾乎不起憶父一生事故紛乘艱

難困苦人所不能受者泰然處之
不露愁容抑強扶弱排難解紛
二十餘事其中最重大者五事
人所不能爲者毅然任之絕無德色
以一書生而爲各方所重者勿貪利
勿營私忠信篤敬故耳光緒二十
至三十年間與許石渠錢子燕夏夔
和孫履安孫仲文張時升孫錦裳
錢立凡孫彥才唐漢舟暨先家兄
際才等提倡學校以開風氣及
走燕京又隨諸遺老諸名流聯步
詞壇廣見聞而獲教益性好文亦
好武所愧文而無文武而不武以
致瓜李浮沉毫無建樹上之無補
於國家下之無裨於社會悠悠忽
忽負疚實深爰舉六十四年中經
過之酸辣甘苦畧書十一付與汝
等知之

生壙記

生者寄也死者歸也生壙者待歸之所也然而母意幼常夢爲夙世蜀僧行雲流水安用壙爲顧所以營此壙者將藏委化之遺蛻耳母意以清同治壬申二月十日未時轉生嘉善城北香花坊之項氏項氏在明科第接踵人才鼎盛鼎革後相率棄官隱三代不應試及自高曾伯叔祖以來一游泮水絕意進取母意於功名利祿少壯即澹然祇欲慰父母期望之心由府庠生而補廩而選拔而朝考得一官走金闈而父母之歿有年矣國家之蝸蟻羹沸亦日甚輒詠北山恐有移文到四絕貽寅僚拂衣去甲寅復北遊謁見陸相國陳太傅諸師互相驚歎時海內名流結社吟詠疊受函邀顧母意別有懷抱不沾沾以文字爭長己未春南旋葬先考石華公暨先妣陸太夫人於

治東九南小收圩之沈家灣計地三畝五分平列八穴癸山丁向中
左考妣中右即母意與配曹氏之安藏也邊左亡長男開騏與媳陳
氏邊右亡四男與媳沈氏三男難產殤六女全貞附埋沈氏之側其
存者二女梅先適同邑庠生沈學洙五男致遠原名開騏北京中華
大學畢業七男開驥肄業北平輔仁大學孫男三母意名乃登字農
若號琴莊晚號息園今六十有二丁茲亂世每飯思歸而天故留之
使再閱滄桑乎癸酉夏五月自記并書

誠子書

字付致兒芝兒知悉敦品勵行立身之本資忠履信處世之方爾等
服務院部應各勤慎職守俾免愆尤位雖不高國之官吏也祿雖不

厚民之脂膏也毋即驕奢毋耽晏樂崇其節儉乃克清廉振厥精神
乃無畏蒞讀陸宣公之奏議乃知艱貞蒙難可以興邦佩朱柏廬之
家訓乃知布帛菽粟皆爲至寶比來天災疊降邊患日深自上而下
由大及小非戮力同心不足以圖治非臥薪嘗膽不足以救亡祖述
聞雞中宵起舞仲淹入仕後樂先憂顧亭林曰天下興亡匹夫有責
爾等其勉旃

江湘嵐師手札一

文字之交一別十年流光如駛企想若渴頃接惠書欣諭榮膺拔萃
足見文章有價交游光寵與有榮焉惟承示及曩曾賜書三封竟未
一到洪喬誤人至于如此青下喬入谷來贛九年碌碌如恒無可告

慰現辦新政調查局并蒙憲政編查館王大臣奏委諮議官徒擁虛名迄無實際且以頑固人辦文明事其爲鑿柄更不待言知己者何以教之附具賀緘聊以將意爲道自重

戴譽侯孝廉手札一

一別如雨思何以任伏審興居萬福罄無不宜頌甚頌甚弟蟄居鄉里無事可爲偶爾抱甕灌園尙不如一老圃他無論矣所幸孱軀近頗健飯祇此一語差堪慰我良友耳損示瑤章諷詠數四如王處仲擊缺唾壺慨當以慷良佩良佩但以弟之不學和學人詩其不見嗤於左右者幾希矣勉步元韻錄請大削錢循丈別已十月曹理翁別更五年雖鐘鼎山林仙凡迥判然生平好尙夙有鍼芥之合翹首京

華未嘗不神馳冠蓋也乞代致意並以拙作示之

徐石樵邑侯手札一

久聆清譽未接高譚渴慕之私欽欽在抱荷夏家慈八旬介壽承邑
之大夫學士公祝製屏幸蒙椽筆之揄揚俾克承歡而稱慶私衷銘
感伸謝有稽迺辱賜書以瓜代將行復承賦詩贈別浣薇拜讀雖未
必阿私其所好總不免飾譽之過情讀未終篇而汗涔涔下益令人
依依難釋矣第以簿書鞅掌筆墨久拋欲和佳章而效顰無暇惟有
俟移寓之後掃卻俗塵或當趨詣高軒一酬唱和閣下能不以風塵
俗吏相待而作門外之麾乎良覲有期先修楡謝

何修梅茂才手札一

昨晚接讀手書知閣下操持堅定趨向端方佩服佩服弟平時亦嘗持此意以語同儕非以爲不識時務即以爲膠柱鼓瑟弟亦不與之曳岳每一笑置之今雖楊墨之言盈天下矣然自明眼人觀之無一卷可讀之書無一篇可傳之作其所以能紛更國是眩惑人心者非斯人之足以亂天下實天下之適至於亂耳閣下澄靜多學涵養深沉王摩詰眞非我友乃我師也敝親許選卿姻伯善丹青弟特倩其續網川書館一幅清超拔俗筆無纖塵此境此人惟閣下庶幾近之爰敢上呈爲賜教之質大著三篇弟已錄出復書中所以未曾并奉者適爲金溪友人所見愛不忍釋以弟所錄者字甚模糊堅欲將閣下原本借去刻尙未璧還容緩數日當奉趙也

教育會沈會長守瓶手札一

頃讀來函係辭退區董一席語過謙抑足徵道愈高而心愈虛也以先生才能任一區董綽有餘裕然龐士元非百里才顏氏子豈霸主佐騏驎下列駑駘本不敢有辱先生但桑梓義務由衆公推還望毅然肩負以表同情曷勝欣幸仍將照會呈上尙祈弗辭爲荷

許明府文圃世丈手札一

別後惟台祺清鬯爲頌前由孫敞親處轉奉寸緘亮登籤室昨毛博之交出到省稟批回公牘一件屬代呈台右特封寄務乞鑒入向閣下瀕行賜讀大作想見胸懷超曠欽佩莫名惜塵溷闐臆難索枯腸欲和不得良用歉如縣令裁缺發端于蘇後路愈窄毛君云有函奉

呈曾否照收

浙撫增子固師手札一

上月停車枉顧把晤歡然以弟才學出膺民社吾道不孤矣刻想返抵金閶起居住勝雀舌一箱隄麋四笏拜承嘉貺感泐綦深夏日炎炎諸希珍衛不盡

英太守雨亭手札一

日者台從惠臨塵談甚快祇以公事牽率不克於西子湖邊一陪遊屐殊深悵悵奉託一事乞隨時函告藉通消息嗣後足下如或來杭希先示知以便飭接也

張處方同年手札四



弟上月下旬因事往返禾郡者數次月初始告竣以故法書收到後
匆匆迄未作覆頃勞綺注謹此道歉并以鳴謝吾公襄文抱質恬淡
寡欲眞我之師每過魏塘未嘗不北向而瞻拜顧以碌碌不克爲訪
戴之行中心悵然如何可言今冬想在珂里度歲日來所讀何書明
年何時晉省便希詳示弟家務羈牽未得與蔭兄並轡北行良爲悵
悵禕兄刻方到省友之同年明春赴京都門握手良晤非遙矣

都門握別又驚秋杪弟自重九節由京動身在途十日安抵里門惟
啟程時僅到部而未到司是以年內尙須北行三千里外奔走風塵
殊有饑來驅我之嘆以視閣下供職金閭近如戶闔眞令人欣羨不
已茲有糟蛋六瓶謹由局送呈左右物薄意誠即希哂納鴻麟遇便

仁盼教言

屢示佳什珍逾拱璧弼少事吟詠長遂頽廢每至落葉打窗寒燈照
夜擁衾不寐百端交集偶抒積愫率涉蕪詞爰用尊著自題小影詩
韻吟成一律聊自解嘲并誌景慕

長至節後奉達蕪函想塵察覽駒陰易逝忽忽歲籥又更矣上月初
拜奉大箸聯珠吟一冊展誦數過覺妙處如香象渡河羚羊掛角無
蹟可尋歲底稍暇率題一律用誌欽佩弟連年疊遭大故爲人子最
慘痛悲傷之境顧家累日重不得不奔走他鄉藉謀餬口此情此景
眞有不堪爲知己告者比復頻患失眠殊有未秋先零之嘆每念蔭
梧諸君怡神家術較之吾輩有僊凡之隔人生不如意事十常八九

惟有誦得過且過之言稍遣牢愁耳老年兄得無笑其無病而呻乎

章椿伯教授手札一

昨奉華函渥叨藻飾并承示大箸長誦一首浩氣流轉音韻鏗鏘敬佩敬佩閣下績學有素考優當如拾芥俟提學行文到學即當借重保列尊作係仿柏梁體自應每句押韻惟中間物競天擇句單用仄聲似與全詩體例不合鄙意此句擬改爲物相競兮天擇良則通首一致詩律更細佛頭著穢殊覺冒昧敬以奉商方家以爲然否弟貧病交侵久思歸去祇以故鄉盜熾未敢遽旋駑馬戀棧輒深愧慙

唐教授贊襄世丈手札二

閣報見大名高列前茅欣喜不可言狀即擬肅函致賀適在旅途筆

墨局諸行篋無可裁箋刻到金華事尙順利伏念閣下蠖屈龍伸一反掌間真是快事前次佐馥同年循例掣籤照舊派歸原省補用事同一律當可無疑京師近狀若何尙冀有以告我也

承示麗製兩闕倚籀歛之腔板俱合不必令黃旛綽更造局譜也倉猝未及屬和謹錄舊作三首先請拍正眞戾家把戲耳勿哂爲幸

陸頌襄同年手札二

捧誦手書惓惓故舊之情溢於言表欽感莫名就謔簞祺日富潭社均嘉慰甚執事林泉養晦書史自娛際此炎熱世界獨醒獨清儕輩中奚可多覲弟前月與味根卓羣晤時道及我公相與歎慕弗置卓羣近於杭垣聞有所就味根在海鹽任勞任怨爲衆謗所噬可見廉

直之難行爲之浩歎聞其近已辭職調任矣衡石平之在京久未得
信宦海風波日惡一日恐此後長安居更不易矣弟今歲濫竽中校
頗非私願之所安兼之風潮疊作每况愈下對此景象腦筋中不無
棘刺是以下半年方針尙未定見耳賓初兄久踈音報便希代候
良久契闊方深想念令郎來校蒙賜照片詩章并法書對聯厚承雅
愛貺我良多感謝不盡愧無以報味根應考知事大手筆定擅勝場
然如兄之澹然無競識見尤爲高出矣


葛蔭梧同年手札六

洛誦大敬謹家街怡神樂檀有慶大著拜閱數過以雄渾之筆發
沈摯之思精理名言得未曾有是吾師也敝邑諸同年集字會課爲

明歲廷試之預備今寄奉朝考卷兩份敬俟法書爲斯會生色另一份懇交賓公爲荷

兩奉大教碌碌未報嵇生性懶於此可見新歲伏維既多受祉洛誦佳章傷時感世一往情深足徵老同年抱負不凡無任心折梅藍諸師均爲歎絕弟於此道本屬門外漢謬蒙不棄真所謂問道於盲矣字卷胸屈截限懇即撥冗一揮至以爲荷賓公所書字卷墨色略嫌欠勻是必呵凍而作也台旌北指當在何時弟大約三月左右首途附奉先人遺集暨墓銘四種統祈賞收

奉惠牋並法書扇頭拜登深謝妙繪愈見精絕神乎技矣令昆大著寄校恐往返不便倘有少數相商處不妨示及當函札問答也



讀大教欣譙和神當春爲道日益法書蒼老而兼秀逸竟莫辨其似
歐似褚證諸近今尤與高爽泉前輩相似宿墨舊管猶尙如是不擇
筆墨而妍捷裴虞復見於今矣心折之至弟將來有題件奉求能俯
如所請否

虎林歸來得拜大教藉譙吾公移玉津門不知所入較優否令兄清
芬錄弟未捧讀何時刊行示及欲借舍間藏書爲校勘之需請將令
兄大著郵遞如可與敝藏資助者自當稍効微勞否則應需何類
未便貿貿然繙檢也諒尊意亦以爲然耳北方大局日緊吾公能否
甯虛時用懸系子庚同年所刊其尊人詩詞久耳盛名南中索者甚
夥望再代乞二三部寄下以廣流傳如何

頻年契濶軫念爲勞迭承見貺先德墓銘暨吾公生壙誌情志曠達
寫作俱佳諷誦數四愛不忍釋家叔命筆道謝弟株守家屢依然故
我歷年往還平滬自商業折閱以還愧乏補苴之術徒唱懊儂之詞
兼以租務則增捐營業則加稅生事殊寂寥也吾公任職交通有無
兼職月薪尙可支持家計否今歲如得南旋一罄積愆尤深翹企弟
近年心緒懶散坐是善病工愁藥爐經卷消磨歲月目下稍見痊可
所苦領不起精神用不起心思耳箋候久疎職是之故海內風雲靡
有寧日顧瞻周道曷禁慨歎吾公諒亦同情也

張卓羣同年手札一

薊門一別倏忽三年世變滄桑幾如塵夢年來奔走風塵北轍南轅

勞人草草今夏甫自黔歸又作遠行之客橋霜店月觸目增懷每念
諸君子息養里門得享自由幸福不知幾生脩到羨焉奚如來函頗
以殷殷爲念如弟不才而先生不以樗櫟見棄則變也得一知己可
以無憾矣弟來此已逾月餘一無表見而民風之刁悍民情之健訟
黨派之林立盜賊之蠡起較吾鄉爲倍駕馭殊不易易老同年將何
以指教盼甚屬鈔程氏控案稿已飭辦稍緩寄覽

虞柏頤廳長手札一

武林把臂暢聆緒論未幾風雲復起遇於海上呼籲弭兵俠腸義膽
至爲欽佩別後弟即赴燕爲君游揚此間諸公頗思借重前者朱督
擬委君百里婉辭未就比聞屈省長又擬保送考驗知事望即北來

常承雅教至於考與不考則聽君自便也崑函布達佇候台旌

陸相國手札一

得來書悉別纔數旬世局又變歐球蝸沸海波怒掀一線濤來青氣
忽墨桃源避世者又紛紛自桃源避入世中此真不可思議敝眷入
京所攜不多書籍什物俱付之概不可攷之列幸兄素性曠達不爲
物役但得人口無恙即便怡然知念奉告尊箸各作佳處極多將來
必可成家惟尙有隨手不經意之句妄加圈點即以奉繳

孔虞琴同年手札一

燕塵揖別寒暑迭更每念良朋輒殷悃悵夏五自鄉葬母歸奉讀大
札及振霞世兄小傳驚悉台端抱西河之痛代爲於邑昔王衍喪子

天下痛心延陵適齊號於羸博珠碎掌上蘭摧庭中固無弗悲不自
勝者惟冀吾公曠懷達觀弗過憂慮世兄生有夙慧神質非凡既經
神巫言邀還嶽山供職洵爲長吉一流人物天上修文吏還香案夫
復何憂想兄當亦善自排遣也榮之同年久未通訊忽聞連折四枝
何善人君子所遭之慘一至於此深爲嗟歎現屈定陶何處乞將地
址詳示以便函慰弟閉門哀母心槁淚枯目擊風雲欲行頻止近狀
何似尙祈示我數行以當把袂

吳劍華協修手札一

日者途遇未得暢領教言忽承惠我好音并讀新詩四什俊逸不群
殊深傾倒更何疵之可指耶戲筆步韻聊博方家一粲

周禕侯同年手札二

春間蒙賜教言並賸墨寶鹿鹿久不報謝歉焉奚如今復荷大札頌
來清風故人如聞告語不勝狂喜公學殖湛深勞文宗夙重舊學定
邀識拔意中事耳何日首途良念良念弟鬱鬱居此幾及半年自愧
庸駑了無表見頃奉新藩吳方伯札委赴皖南桐城縣及樅陽釐卡
各屬守提欠解丁地銀兩差事勞勞奔走殊無寸補不棄禱昧時錫
南針無任跂佇

五年中再與同游燕都把臂傾談互述浪跡旋袖出自題新映小影
詩一首索和僕於聲律之道夙懃研究窮搜枯腸勉成五十六字貽
笑大雅自知不免

黃徵君慕周姻伯手札一

春間接奉手書祇以懶於搦管遲遲裁答歉甚近惟旅祺潭社皆大吉祥懌如所頌拜閱近著栗志貞傳寄託遙深不啻爲自己寫照世有其人馨香祝之矣不第作賓戲客嘲觀可也又承屬壬申迄今見聞所及隨時寄奉弟本擬自撰年譜亦有是想然終日碌碌四月中錢曹二老壽辰先期製壽序觴酒流連極一時之興繼即於五月初患痰濕之症淹纏兩月始克平復入夏以來始也亢旱繼遇大風今又風雨成災田禾大損連年災歉米珠薪桂貧民生計無日能蘇爲可憂耳督徵委員蒞善已逾兩月三年併徵一時民力實有不逮幸賴幹理諸老有電至省公署及財廳尙覺和緩晚晴謻詩社徵海內

名人詩已否竣事弟與嘯登託曹理翁帶去有魏塘詩存魏塘詩鈔
二部乞轉達代爲保存賓初味青秋槎諸君屬筆問好弟自病後精
神稍疲不能遠走詩亦少作惟逸社集飲六人皆無恙尙不致寂寞
耳今年五月得一曾孫爲快事差堪告慰錦注者也

曹理齋局長手札十二

鄉關雲樹夢寐繫之得書亟慰渴思章前擬作塞外之游稍自舒放
已與樞相言妥旋因疫癘盛行道涂多阻且外人陰謀日著邊事岌
岌頓生戒心遂寢其議刻奉樞相檄調辦津浦鐵路北段總局幫總
文案三兩日內即當到差月薪雖較現席稍優亦祇苟延旦夕而已
數月後若邊信稍靖仍思杖策而東也賢者浮湛人海無援手之人

固爲非計鳳相乞假旋里盍往一見其就蘇圖之

大旆以試事至都宏才所蘊定當首擢預賀預賀佐馥來津稟到即
住寓中日內仍須進京循陔在幹臣處公已與相晤否

奉示崇論閎議於斯世癥結之所在洞若觀火可佩可佩惟各項情
形亦人人知之特不能力矯其弊爲可歎耳公餘有暇早晚過我一
談甚盼

奉書知已安抵里門文郎之病能否日起有功念念弟於重九後偕
幹老赴輝縣爲東海相公祝壽藉攬蘇門之勝甫於昨日旋都國事
依然岌岌無可言也大駕來時望帶字畫數件已函告舍間請公與
虞笙接洽可也

大著拜讀傾倒之至題耕煙圖詩大氣盤旋字字有力直可作紫珊傳讀也

示悉柳溪竹枝詞容細讀之大著詠物詩尙未得窺全豹便中祈賜我一讀文郎病狀兩紙檢奉台警賤恙已漸平復步履如常惟脚枒中水仍極多且極癢故尙未銷假也

多日不晤甚念春老刻詩弟爲經手寫樣一卷已校閱一過請兄再一校讐此事固不厭加詳也

費君證書遵即填名蓋章繳上賤辰辱承厚賜萬不敢當犬馬之年無足挂齒想當鑒此硜硜也

前者滿望大駕來平得以晤談稍紓離悵乃盼之多日未見惠臨得

三十日書始知從者到平後因事即返曷勝悵惘七世兄投考輔仁大學兩場名次皆極高具見家學淵源絕非凡流所可冀及羨佩奚如舍外孫張應麟亦在輔仁與七世兄當是同班數學相長亦可收切劘之益也

久違甚念奉書並讀新詩如共晤談快慰無似滬亂爲從來之未有慘劫四小壻包和甫住當戰綫全家大小九人冒險逃出苟全性命而除隨身衣服之外一物未攜屋旋被燬借住人家衣被俱無信來告急趕寄數十元令其到弟家中暫住日前來訊知已到善惟內子本已甚窘驟添多人喫飯必大爲難弟又不得不設法接濟鯨鯢肆毒波及三千里外之病夫橫遭劫耗亦夢想所不到也

新年尙未通訊惟道履諧鬯爲頌弟病體依然所幸眠食如常三孫茁壯對之足娛老懷家叔臘杪南旋大約仲春望邊可以北來芝年七世兄溫文爾雅不染時下習氣尤爲難得年已及冠議昏亦不宜遲現有南中至好欲託弟爲作伐但當此時局不識老兄與嫂夫人對於此事是否聽賢郎自爲選擇抑仍循舊規由堂上主持忝屬至好用特先行奉詢祈明示是荷

昨得家叔滬上來信云與公里門相遇刻想大旆當已安旋沾上矣七世兄畢業後現在何處甚念甚念先曾叔祖容軒公諱許燦所著姓譜典略與姓譜續典兩書手寫稿本前經陳嗣颿兄在一骨董客手中買來寄我並云此骨董客得之於張涇匯項氏則是貴族際才

兄所藏矣惜已殘缺頗思訪求配齊全書家叔信中云曾與公談過
公允爲問之屠慧子不識已經問過否祈示知

盛味根同年手札三

去秋歇浦別後魚雁罕通後聞蒞省半月仍返珂鄉論大局斯人不
能不出論私德我公不能不處今歲絳設河東抑或鼓聽吳下遙瞻
芝藹無量葭思弟客冬羈滬興味毫無今春僕僕滬潯仍乏華狀每
乘汽車道經仁里輒擬下車訪賢作竟夕譚時時爲事催迫莫遂私
懷未知何時樽酒重論詩文回首京都不禁有今昔之慨刻因家務
暫返故鄉倘賜玉音逕寄新睦

廿年前南橫街會館晨夕暢聚回溯如昨又如春夢比奉手教紫芝

眉宇宛在目前平兄年來奔走金陵去秋忽膺氣喘不能出門迄今未見復元其世兄三人均已出山大可息影田園優游晚歲前後在江西三握縣篆最後黎川挂冠而返清明節畔朱少沐兄旋鄉掃墓述悉騶從稅駕津沽羊采如故積年思慕我勞如何憶前試罷南旋上海起岸遭流氓之非禮閣下逆來順受幾有犯而不校之氣度賓初兄則耿耿於懷必欲得而甘心弟則當時不能釋然越數小時境過情遷且佩尊懷之大度厥後賓初兄宦游七閩未得展其所長退而執府校教鞭咫尺鴛湖大可盤桓晨夕其時弟奔走京寧北轍南轅未遑暖席迨解組歸來則賓兄訃音已至古人謂晤面有緣非獨晨昏晤對造物若有安排即魚雁往還遲早似亦有預定非人力所

可強致者友人傳述令世兄服務本省爲黨部之柱石近且代表國
民參預會議果爾則箕裘繼述不愧頭角崢嶸弟則老犢困犁頑豚
不角現盡遣入商界書箱早經拋卻對我老友能無自愧承賜息影
集詠韋令遺稿郵局尙未遞到鵠候先觀快心當亦不遠

別二十二年矣此二十二年中天崩地裂滄海桑田迄今風潮仍未
安靜弟自婁東告歸藏拙市廛從事陶朱之業昔尙繁盛迨滬戰發
生銀根停頓商業凋零芸芸衆生都無活路杞人憂天祇能強自排
解晨起誦經飯後無事惟有看書王湘綺日記翻第二遍老友漸少
平之兄去春得血症病骨支離此時養病西湖聞未減退以其氣度
從容而適得此疾養生之說全不可靠騶從南旋務望來禾一聚人

生會晤豈有前定未能以人力強之耶

錢戟庭領事手札一

憶自里門晤教又兩易星霜矣頃展手書就謚政績日懋旅居多綏
快慰渴衷弟濫竽無狀深自滋愧年來外界之激刺與夫此間僑情
之扞格頗覺宦海中毫無樂趣近時大局岌岌此邦人士輿論激昂
誠非我福遙望祖國極切杞憂弟以家累一時尙不能遽退如何如
何小兒來東三載商科預科已畢業現入明治大學今夏商科第一
年級卒學如不落第再兩年可畢業矣承注附及和甫賞延階平禮
齋諸舍弟想常面晤

顧怡如秘書手札十三

睽教數日不盡勞積適奉佳什情文並茂陳貴陽水流雲在圖之作
瓊璫無足云也敬佩敬佩近作贈如燕律句錄請方家政疵拙著隔
世集一卷爲亮才周君將去異日再呈教

星期捧袂比又數日雖別少會多不盡勞積也書齋岑寂我求蒙童
署學究之頭銜則越資章甫苦方言之隔閼則楚傳齊人終日伊哦
足鮮出戶昨至望園遲駕久不至乃偕循丈暨亮才彥臣諸公杏花
邨小酌看隔簾之花影聽別院之歌聲即席聯吟得滿江紅詞一闋
至足樂也茲有以瑣穢奉瀆者因此間服御動異南土歐陽公三上
之未苦不慣常廉將軍一食之頃未有得所憶桐卿臨行曾有便桶
寄在尊處如無須乎此當遣人來取宏濟急之量開方便之門想執

事所許也附上近作並祈教正

昨夜酒闌選勝花裏逢君重來阮肇劉晨知仙子本來同住臥看牽
牛織女正人間最可憐宵辱以不遺翩然見召兩行宮燭識素衣畫
面之人半壁籠紗讀濕淚青衫之句雖紅兒比賦早讓君一顧空群
而綠髻豪情猶分領二分明月對茲佳序不禁清愁靜夜獨歸得小
詞一首錄請賜和惟望簿書暫撥珠玉即還

賜題拙集大作洵一腔熱淚以和婉之音出之是上乘語謹拜君之
嘉務懇照書爲感前鵲橋仙六字束句亮才考之詞律確是七字深
愧匆莽敬以奉聞並誌我過昨夜託亮兄代奉格紙數頁公得暇賜
書數張以便二子奉爲楷模所附小詩因於席間匆匆所成頗不

稱意改定呈教

都門判襪裘葛一周前者由階平兄轉到台函郇雲五色天外飛來
浣漱開緘曠如復面佳作二十首借物寓意可怨可興此蘇長公咏
雍秀才草蟲八首也佩服佩服銘老處容錄副寄去邇來都中人來
問悉近况必爲扼腕豈天將蘊釀詩人故以窮愁相付耶弟珥筆從
人碌碌故我守此破硯殆與閣下同獲石田也鄂中局面已大非張
文襄作督之年而居停去志久褻意興寂寂近來間有吟咏譬之雁
號鶴唳動是愁音摘錄如干首另紙附覽客中情緒畧見於斯所恨
青衫半濕和壁上之新詩紅豆一升踏天街之明月茲游邈矣舊歡
之續當復何時江樹燕雲努力而已閣下詩刻畫而無斧鑿之迹沉

鬱而無煩促之音不僅詩佳且決將來必有大得意之日請君存此
信以驗將來何如江浙大風鄂中又飛蝗蔽天天怒未厭爲可憂耳
久曠箋敬正在馳囊忽奉手書並示佳什泚泚蘊藉字字珍珠益覺
金碧樓臺非下界寒儉人所得登拾徒有張口噴噴公詩本極深造
別來數歲眞覺劉眞長如天益高若弟則奔走塵俗日與飢隸餓皂
同牢而食腸腑間歛歛皆惡濁氣安得有詩有亦安得長進上月忽
患疝癰委頓牀褥日謁數醫近雖稍愈尙難收口有朱似石太守與
弟雅無撫摩之分而問病飛牋勸以戒詩寧養感其意誠近益不爲
詩頗欲摘鈔舊作數首呈請法正而筆懶意遲病未能也容緩錄奉
徐萬翁出差外縣尊信容俟其旋省代送幹老入平政院兄近事亮

優於前脚底青雲從此一蹴而上矣大稿印成後以先睹爲快

前蕭蕪函旋辱誨會拳拳之誼不以疏逖而間幸甚幸甚魯齋兄回
徐重荷手書益以墨寶之賜詞筆兩絕爛矣瓊瑤珍諸行箱重若十
賚稠疊厚意將何以爲酬文郎之耗弟茫無所聞以右軍哀樂困人
之年卒有子夏西河退老之痛且文舉祖德同以終軍之妙歲作揚
氏之童烏愴慟之褰料難自己幸有班馬文筆足以爭永千秋讀大
傳一篇彼之閔顏已成彭祖區區修短不足再傷諒公亦早解斯悵
矣先後所示佳什氣魄深厚詞意雅潔五言數首當與湘綺老人把
臂入林七言鬱伊善感顧影徘徊又在牧齋梅村之間不圖一別數
年孟晉如此驚佩無喻弟詩雖亦時作力弱氣餒比在都中時更似

退步稍暇容即鈔呈數首藉正有道晚晴窳選內容如此弟幸未鈔送免得徒費筆墨讀尊句云賞識無真駿骨埋遂欲唾壺擊碎

郵使遞到大作發函伸紙不啻朶雲從天外下降捧誦數過懷人感舊情見乎詞且復墨采飛揚忘是和韻之作梅仲真鄰當爲公下矣尾頁潤格適獲吾心弟自來徐州逐臭者亦多有壽文浼譔弟則抗顏伸手待錢命筆蓋若輩有者錢吾輩有者文吾輩無錢時向若輩乞憐不知若何艱苦則若輩無文時向吾乞憐亦不能輕易放過也惟徐僻陋易爲雄伯若都門人海必得大才方可爲我輩吐氣耳都門解后喜出望外急裝待發未得從容承教又使黯然弟返津後即就差關署但署中無宿舍須在外租屋目前恰有舊居停段芝晉

觀察在日界稅有樓房兩間空而未用因向借住然勢亦不能久居
弟此來本悔孟浪現既來此又未便望望而去擬敷衍兩三月再謀
擺脫我公近來作何消遣時難方殷筆墨生涯意必減色不知賣賦
所入能敷支持否倘有新作並盼賜讀旅中枯寂得故人一紙書不
翅空谷中警欬也

敝友被劾得何處分敢乞便中一示幹老靈匱過寧弟適在徐未獲
叩送聞定廿二在善開弔當往申雞酒之奠也閣下有無寄挽佳章
鈔賜一讀弟集張玄誌得百餘十聯友人勸印行以無足問世遂尙
束閣遲日當呈教也

忽奉朶雲知前者拋磚真得引玉矣大作神似漁洋風調獨絕末句

改羸得二字尤使通首響亮亦足見法家爲詩雖率口小篇一字不輕放過若此視弟前投之作真施嫻矣王君事極承關注感感前月頌音兄交讀壬戌大作隲古箴今邕邕華雅自於連珠外別抗一幟知公寢饋選學非率爾命筆也弟之嘉禾章領憑前年由魯兄帶京存在兄處現因有緊要關係必需以之備證敢煩迅爲檢寄至盼至盼

高衆議員天梅手札一

昨蒙枉顧暢譚甚快別後以大句見貽詩書兩佳尤爲傾倒屬和稍寬時日可乎日來院中事冗未克趨候至以爲歉容緩奉訪當把臂深談也

迺夔欽太醫手札三

平昔舊交京華聚首愉快之情莫可言喻中堂對公極賞識極關切臨薨之前尙詢公近况然而中堂知公之品學兼優猶未知公之俠義有非尋常人所可及者弟自鼎革後蕭然無以爲計如見幹老理老乞代嘯拂至爲感禱

都門揖別黯然銷魂此次南旋實非得已蒙爲揄揚感深肺腑布置妥後即赴杭見貴同年來君以公之介情意甚殷但人浮於事代謀非易弟亦不能久候省垣旬餘返善里中稱道我公咸深欽仰銘老與諸紳創辦因利局邀與帮忙姑且託足徐圖邁進也

文兄虧折約五六萬薄欸蒙與洽妥提前分期歸還使弟得供饋粥

熱忱至感何時旋里乞先賜示以便趨迓此間舊交盼公返旆圖歡
敘者久矣大著愛國之忱溢於言表假令乘時得位展其抱負當是
萬家之生佛也翹企禱雲無任馳仰

周志成領事手札一

日前東渡既蒙餞別復勞遠送甚感甚感弟託庇福曜業於一月二
十三日安抵橫濱二十六日接事惟到任之始對內對外公務甚繁
致稽申謝曷勝歉抱此間自經去年震災後諸事草創茫無頭緒尙
祈時賜南針無任企禱

葉瑞竹明經手札一

天末歲殘賓雁南歸魚書下賁言辭斐溢栗志貞傳愾乎大言如朔

客難如雄賓戲世無法眼抱璞徒珍雖垢塵泥信可免乎然劍或他
飛非主不託玉沽有待善價將成古之所語今何不然貴則千金賤
則敝帚阮哭孫嘯有由來矣近居吳市逾於范丹鬼旣擲揄人更慢
侮韓辱胯下孫念心中恨未能化若牛哀磨牙入市友無羊角誰念
伯桃撫躬自省花甲將週深恐一朝乘化爲孫公吟詩之鬼所笑每
於三更夢破萬感塵來更不知天地蘧廬聖賢芻狗爲何事也欲訴
無聲欲哭無淚此情此境要非靈均大卜所可占決者矣先生道高
境閒猶多頽顛况處荆棘能無怨尤奉書遠貢兼賦小詞大雅南針
是規是矩知己爲懷如何如何上望加餐不盡覲縷

高閨仙司長手札一

敬奉賜函及大箸聯吟集二部細讀一通覺氣息深純風神跌蕩洵
詩家真正法眼藏也佩服佩服其一部已送致羅君揆東矣

饒苾僧總裁手札二

佩仰高文積思成痾龍門絲邈我勞如何家母六十壽辰前已將事
畧紅箋介呈左右自慙不肖久忝所生誠欲仰藉宏詞俾彰穆行下
風引領悚仄交并錫類之心諒不忍拒用敢專函奉懇乞賜撰一詩
於明正三十日以前惠寄津寓感激之忱匪可言喻

前蒙賜詞爲家母壽甚感甚感頃復讀詠物諸作寄託遙深傾倒無
任已裝裱成軸矣黃陂題字特隨函附呈左右乞予營收祥素不能
詩辱承尊屬他日擬勉一爲之不知能成章否也

夏夔和主政手札一

旋里以來時親霽宇與閣下談如飲醇醪矣日前弟與景思之爭非私爭也欲化私爲公也夫一縣共立之學校豈可一姓據之得閣下大函鑒空衡平糾紛遂解弟固心折彼亦首肯魯連高風令人欽佩不止也

徐小海縣令手札一

奉函敬悉外人入內地賃屋表演戲劇條約所無弟亦深恐滋生事端祇因碍於某紳情面隱忍未發既承大示已勒令該外人等出境矣再戟門小壻昨已返蘇料理私事當即晉都臨行懇促未及走辭屬爲代達謝忱

錢觀察銘伯先生手札六

賜讀大箸詩詞並前由怡如兄寄到詠物詩二十首維誦回環各極其妙拜服拜服具見澄襟超曠雖輒紅十丈不足擾雅人深致若弟者衰老之年思筆枯澀是以上年曾奉錄示自題小影佳律遲遲未和茲勉成一首敬祈斧正知不足博方家一粲也弟里居杜門上月患病兼旬近甫健好家鄉本可秋收中稔舊歷九月內霖霖連朝淹沒稻穀忽成歉歲業經公稟省中派員勘荒矣

前由平湖葛府寄到頌貺自書大著橫幅佳章妙筆敬讀之下愛不釋手俗冗稽謝尤爲悚歉月初循柏姻丈交閱閣下致函敬審勛履咸宜允協遙頌所示擬辦豢耕牛一節並割廉泉以爲提倡適循丈

以典事損失無暇議此囑弟轉商同人當與楚卿慕周諸先生暨彥才伯蟾諸兄集商僉以仁心利物極深欽佩而設廠豢養無論手續煩多而需欸甚鉅即改爲當牛局亦難嚴立限制約計非籌集二三十萬元無從開辦當今之時何從集得此款徧商以徵意見一時難以舉辦有辜慈善宏願均因財力缺乏爲歉循丈近又赴松隱屬弟奉復並詢尊欸如何處置候示遵行再前寄來雅唱花近樓題詞業已轉呈屬筆道謝

承示前欸捐助登壽公所當將來函送循丈閱看當此募欸不易之時慨助鉅欸无量功德同深佩仰收照附呈台察奉錄眎和徐君雅唱杜老胸襟慨乎言之可稱詩史弟里中伏處意興索然雲天在望

輒復神馳

韋君壽恒遺詩前懇吟壇賜加刪潤不勝感佩嗣遭亡室之變心緒
惡劣將此事擱起春夏間因僑居魏塘沈思齊先生詩學精深袖稿
丐其再加推敲又點竄數首而力主酌印將少許勝多許以存其人
并爲製序弟亦附一首茲再寄奉法眼鑒正並代求賜題序文或作
跋語悉候尊裁有瀆清神諒壽恒大令九京下必感深銜結也一跋
惠復將稿寄回即付印行

賜讀題畫大著詩章浣誦再三前四首風情旖旎好語如珠後一首
古色古香憂憂獨造佩服佩服春間台旆旋里草草盤殮寥寥薄物
申敬尙荷齒及殷殷益增慙慙弟自八月來患病許久近始痊復以

致屢欲函候稽遲至今萬分抱歉今秋家鄉霖雨成潦高田亦被淹
沒人心皇皇已將災情電省近時糙米價每石七元數角亦向所罕
有也

弟伏處蓬廬常多無謂碌碌之善可告正擬裁牋奉寄昨承致遠世
兄顧舍得談爲慰並荷見賜攝影神采奕奕懸之座右幸同晨夕晤
對捧誦自題佳句詞筆之妙元箸超超尤深欽佩前當滬案發生甚
至罷學罷市罷工稍明事理者靡不謂似此愛國適以害國其實盲
從者居多尊論云云無不切中時病自奉軍南來江浙又多謠誅所
幸當道屢將和平宗旨宣布報端人心一定今頗安靜矣

范築先營長手札一

慕先生之名而生敬見先生之面而生愛兩次南旋獲陪樽席祇承明教受益良多別後不勝葭溲魁前年調駐貴邑約束敝部每日率領操練不准私自出外購物照算付價不許強佔便宜士民交稱謬竊虛譽詎上月江浙緊張魁因公晉省適來一客軍敝部少數不良份子爲其扇動致有越軌行爲聞耗趕回該軍已逸祇拿獲敝部肇事數人從嚴懲治現正辦理善後反躬自問何以對地方雖士民未加深罪而痛心固靡已者矣遠勞垂詢謹以復陳伏祈恕宥

徐旭瀛院長手札二

別來歲籥一更矣辰維興居晉吉政祉迎祥爲頌正懷念間接奉大著聯珠吟一冊開函展誦琳瑯滿目美不勝收想見筆花璀璨揮毫

得意時也欽佩欽佩邇來京師諒甚安謐弟并垣備位鹿鹿如恒彈指光陰瞬將一載自顧材力薄弱建樹毫無每一思維輒增顏汗尙懇時錫教言俾匡不逮

前奉華章敬聆一一此次滬院改組弟以菲才謬長高院才輕任重時懷履薄之虞黽勉從公常有汲深之感迺荷藻飾逾恒益覺慚愧無地並由郵遞到大著三冊拜讀一過欽佩之至謝謝魚鴻多便冀賜教言爲盼

沈衆議員衡山手札一

子建事慧公一人之力已足弟附名而已賜讀述懷一首佳章璀璨不勝幸佩因擬勉和數均以報瓊瑤一度吟哦轉致稽遲作答愧極

愧極正月團拜俟有定期遵當先由電話奉達

來聽松同年手札一

迺夔欽先生來奉到手翰恍逢舊雨而聆清譚拜誦之餘至爲欣慰承委一節弟位卑言輕恐無進行之機好在迺君尙有周恭先俞襄臣兩先生相識自可徐爲設法弟處樓臺近水當遵命爲通消息可也惟近日因省長問題風雲日緊恐大局未定以前尙須稍待至迺君精習歧黃既可爲良相亦可爲良醫實深欽佩倘有機會定爲介紹

白道文簽事手札一

前次回津有疏趨候比因未了事件復來北平驟感沍寒體又不適

尚須小作勾留纔能邁返也頃承惠翰并拜大集之賜於詠物則寄
託遙深於紀聞則慈祥在抱亦仁亦智欽佩無量此後近接高齋獲
益更非淺鮮矣

關穎人司長手札一

奉讀尊札並大箸不勝欣佩路事興革端在熟諳利弊者直抒所見
庶足以共策進行執事擬提出議案以待公決本會無任歡迎尊箸
當刊入本會會報以供衆覽

朱賓初同年手札一

大著壬戌論沉浸穠郁含英咀華見者無不欽佩已刻入學校週刊
矣每思我哥俠腸毅力見義勇爲不貪名不圖利尤爲儕輩所不可

及此間咸謂我哥爾時稍與浙當道周旋早隆隆起矣弟則謂若肯
與北當道降志相從亦早隆隆起矣然而遇不遇得意不得意淡然
兩忘行乎其素叔度千頃汪洋真我師也舊交都甚望盼春間能否
南來倘有行期乞先惠音以圖叙晤頌襄子庚兩同年俱在禾校并
以附達

陳鼎丞同年手札十

亂離中東勞西燕問訊多乖前倉皇離濟時知君關懷我不同泛泛
當函毓姪奉告平安頃辱書知以毓姪遲筆之故轉勞垂念益切三
復大緘感何可喻弟旅滯都門十有餘載今此之歸湖山無恙城郭
已非俛仰今昔良滋感喟弟因杭垣度支較鉅已於前月廿三日挈

家僑寓嚴陵與小壻徐逸群同居清風兩袖得毋見笑山靈君與我
相愛深所遭亦復相似何造物弄人若是耶前此去濟箱篋未攜於
猛烈礮火之中弟惟閉戶作畫題詩以自遣蓋平昔讀書對於禍福
二字早已夷然處之茲錄題畫詩五首藉博一噓工拙匪所計也
乍辱手書良深感歎弟自去秋患瘞痺直至春初始痊比者棲遲海
上經友介紹稅務秘書日無所事俗所謂拿乾薪者雖所入不豐尙
足勉資生活耳萬兒遠離鄰下舉止言動料不免浮囂習氣幸尙知
親近長者獲益自不待言迺承獎飾逾恒深代悚荷昔人謂龐士元
稱引人才往往言過其實我兄得毋類是諒亦愛我者深且切也時
局風雲頃刻萬幻譬彼舟流不知所屆眞苦得人民作熱盤上蟻耳

吾浙自春徂夏闢荒日有所聞距秋收期尙遠奈何奈何

故都判襪忽忽四霜北睇燕雲彌滋苑結辱書不遺在遠感何可言
值茲陰霾四塞吾輩鬚髮已皤寧復夢想河清乎弟秋初一病幾瀕
於危蓋文旌南邁弟尙在病榻中也二令郎肄業燕校竿頭日上自
非吳下阿蒙譬之良田秀穎益以深耕易耨豐收可預券也敝局業
經結束今後生涯又不知向何處別尋畦徑息詠十冊遇知音者當
隨時俵散之陳師處另泐丹簡便中晉謁乞代袖呈再前賜和五十
初度詩濟亂中失去今猶耿耿在懷倘逢興到時懇再書小橫幅見
貽無異珠還合浦也

前由毓姪轉到還雲懽如握手承示佳什寫作雙絕令人愛不忍釋

第杜陵身世俛仰蒼茫知者蓋寡致足喟也滬變發生嫂夫人久抱
沉痾賴五世兄扶掖左右挈家奔避適君與七郎又遠居河北白香
山詩云田園寥落干戈後骨肉流離道路中吟誦一過同深淒絕所
幸天相吉人獲告無恙至爲喜慰萬兒現奉皖財長何委爲主任調
查事宜又戈卓超年世兄現任蕪湖皖省米糧查禁處處長因不能
常川在處約萬兒前往主持一切知念附及弟秋後擬挈眷歸里着
手修譜俟告竣再圖出外小詩一章邨笛山歌聊供噴飯
久梗音問懷何可言乍由滬轉到瑤緘喜溢望外弟年來本無心作
出岫雲比因吳同年健陶長贛財廳電約來贛江路悠緬雪虐風饕
益以沿江匪患迭生此行可謂飽嘗艱險矣初四日抵省細察此間

財政情形殊無辦法外省人居百之一二惟既來此似不便遽歌黃
鳥擬俟來春稍暖往廬山小作勾留便趁暹棹也

天末涼風正深歎憶朵雲飛下頓療輞飢並審動履罄宜吟興猶昔
至慰弟蒲節前請假回杭即擬從此息影尋奉文委查浙省財政情
形復電催回廳不得已仍冒暑前往藉全交誼詎陰歷七月間大帮
股匪陷樂安攻臨川大有直撲省垣之勢斯時省防空虛弟亦數夜
不敢宿在廳內比已安謐如恒惟以周甲衰朽之身旅外極感不便
已於七月初辭職言歸曾撰十四字書以自壽云覺還今是開三徑
媿不知非又十年足下聞之當亦爲之憮然萬兒現在大勝關代戈
世兄卓超主持安徽帆運米糧管理局事務毓姪亦在此風聞事尙

可爲但羨而妬者大有人在恐戈亦難久於其任也季遲纒蘅兩同
年近曾彼此通訊一次媿夫人病魔既遁自易復元深爲慶幸令館
甥沈一峯暇當走訪承示題照近什信筆呵成却得絃外音尤徵福
兆延頸北睇書不盡懷

臘底接奉大札及賀聯情文相生通光蓬華感謝感謝承示朝鮮朝
莖名流贈什熨貼細膩具有根底似非率爾操觚者可比多山方伯
來書亦饒有明人尺牘氣息足見我兄窮年矻矻反獲知己於異邦
視白傅之價重雞林且遠邁焉翰墨因緣真堪歎羨今歲南中天氣
奇冷殊恒寒士當之益形意沮生計一節尙須問諸太空耳

中秋前七日曾奉寸緘亮達典籤弟已由六部橋遷中城扇子巷懸

壺鬻畫秋後較佳現兼授男女生十餘人有專學鑿及研究國學者有學畫學篆刻者女生均大家閨秀男生亦世代書香束脩所入差堪敷衍此後生涯擬即堅抱此旨以送崦嵫而已夙荷骨肉相愛爲我揄揚感何可言貴友處望以婉辭謝之

秋雨瀟瀟懷人正切忽於郵中獲讀兄生壙記神爽爲之一豁既而感彼此之身世溯舊夢於春婆志趣同所遭亦同又不禁把酒問天拔劍斫地矣我生不辰其謂之何弟息影歸來後先七載從不欲與人往還入夏以來復患濕症藥爐時煖牛衣中度日尙能溫習古人書及作畫以自遣謹以告慰敝邑此次被匪攻陷蓋已無家家可歸矣前賜令先君志銘搨片高山景仰向往實深但稽復爲罪耳

渺渺予懷天南地北未修一雁反獲雙魚欣悉旅居廸吉陰興尤佳
至爲跋慰承示盤字疊均氣息深厚匪惟工穩而已文郎芝年學行
斐然其見賞於薛卡之門也不亦宜乎故人有子爲之抃慶者久之
萬兒現奉魯豫統稅局派往烟台監張裕公司酒稅擬接眷前往能
否敷衍殊不可知知在念中因附及之弟自別後心緒日益惡劣客
臘及今正里門被赤軍洗劫一空族中遇害者九人親房男婦現尙
流離道路而毓孫則舉家居滬東我生不辰一至於此謂之何哉

沈德良同年手札一

別來半載時切懷思上月杪展誦大札欣諭瀛眷安寓長安都市天
倫歡聚無任忭賀前者榮旌蒞止東道輶褻恩恩判袂惘然久之重

荷齒及益增惡顏矣己酉聯歡社入社費蒙轉交感感寄來公啟已隨時分交浙省諸同年前云重刊同年錄未知何時始可着手辦理此外有無新發展爲此生色弟意既立斯社必須逐漸擴張以冀久遠如有需欸扶助之處當勉竭棉力也

內部于次長志昂手札一

家外舅壽序蒙大筆潤色並請法書已飭松華齋劃格送上但祈勿參漢魏圭角年月日仍用夏歷下欸概不用官勳須廿六日上午送至階平處廿七日福壽堂受賀敬乞撥冗速揮至爲感禱再課孫讀經擬不讀註騰出餘晷研究史漢尊意如何并希指示

曾小魯秘書手札一

前者晤教殊覺匆匆未獲謀杯酒之懽悵歉奚似比奉惠書并和移居大作及與季翁唱和之詩格老氣蒼佩數無已拙編詩詞與采風本爲兩事采風係由津主編者有時敝處亦以平津近稿相助命書條幅草草奉呈乞教愧未能佳耳

莊震聲大令手札一

前展惠書適以奉差赴修水查案致稽裁答爲歉定修水之役水陸千里時閱三旬百冗山積幸得歲事乃席未暇暖茲又奉檄往潯即日首塗勞人草草乏善足陳閣下高才積學鵬程九萬里不難扶搖直上也捧讀佳章風流蘊藉佩甚惜不才不克奉和耳同館諸君子想常晤談子粹兄有無高就秋濤兄諒仍舊職郁文兄近况如何佐


馥兄已否得缺均念承屬代探之陸君現署永修縣知事比想清興
輒復不淺健羨奚如

內閣孫總理慕韓手札一

新歲感事興到成吟乃荷清聲奏雅惠錫賀章循繹再三無任抃佩
陽春白雪敢孤調之自高璧月瓊枝讓豐才之獨擅

徐觀察六皆先生手札二

傾嗟溜蠹歌作東平蠱惑多端女戎爲甚夢高唐之雲雨描洛神之
粲琚色即是空情徒生竇試觀薛濤豔麗祇留牋彩飛雲蘇小娉婷
惟見墓痕綴蘇醉輿肉障樂雖恣于門庭蕙手脂膚腐盡同于草木
惟慎瓜田李下迺完道骨僊風君子所見略同序文之意如繪至其



情文茂美辭旨纏綿氣流墨中聲動簡外英華彌縟著手成春劉彥
和文心雕龍云水性虛而淪漪結木體實而蘄萼振又云裁雲製霞
不讓乎天工斲斤刻葩有同乎神匠作者有焉豈尋常駢四儷六鬪
靡誇多所可同年而共語乎歲在著雍敦牂陬月中澣賜讀紫燕釵
傳奇序率抒鄙見亂注數言惟希大雅粲然正之

日前賜讀大著詠物首首有影字字有據閣下抱偉才當軸不能用
乃託吟詠一寫當世之情狀不啻禹鼎鑄物其旨微其辭遠婉而多
諷頗得詩人之旨弟如有暇當爲添註

屈巡按使文六手札二

前在京華辱承枉顧並出示大作惠贈屏聯祇緣忙未及謝至今歉

然頃誦手書又荷嘉言飾賀尤深緝緬曷罄謝忱此間頭緒棼如爬梳頗形吃力汲深綆短隕越時虞刻無淑狀可告耳

前復寸牋計已達覽比來都中如何情形便希見告幹老暨嘯理諸公面晤時乞代致意大駕何時南旋倘道經敝轄少駐征驂握手一談尤慰積企

孫佐馥大令手札一

委譔尊公墓誌銘疏淺之學實難勝任祇以知愛之深忘其謏陋草草塞責其中謬誤疵病知所不免銘語尤覺率陋非經大才削正恐不能出示人也務求賜教爲幸

張維城總領事手札一

連接致遠兄書藉稔興居住勝爲慰春間惠寄大著當經分贈東邦
名宿同表欽仰上月南原詩社以重修廣寒樓徵詩弟於此道夙未
研究自入外交界以來國學尤覺荒落偶于公暇勉和兩律錄呈吟
正復因該社將徵詩刻石垂諸久遠務乞改削並請和一二首于十
一日以前賜寄敝館以便彙送爲荷

殷介生司長手札一

玉帥開府洛陽公務紛繁尙須得人佐理屬爲物色以閣下才學如
肯屈就即可由郭祕長陳明帥座修書聘請未知尊意何如弟刻寓
象甫處仲文兄亦來此星期日乞惠臨面談至盼

朱謙甫主政手札六

茶樓邂逅洵屬奇緣既領教言復叨酒食反客爲主媿赧何如久託知交亦自忘形迹也前蒙允爲亡室作傳感激涕零附上事略一份即祈警閱藉椽筆之表揚名垂彤管則亡室亦當含笑九京矣尙有孫康侯表姪祭文一篇語多欠解敢乞分神畧加刪潤以便錄存伏承高誼

正擬發信忽奉手教並讀佳什感佩無已率和一律即希斧正至盧溝二字考諸佩文韻府暨橋旁御碑均無草頭而昔年張公束先生復以有草頭爲是敢質高明

頃接示我紀夢大作而前函附呈事畧並未提及抑或付諸洪喬請即查示所有亡室輓聯等類均已錄出專候大著補上俾成專集想

知己者必不吝惜筆墨也近與士文諸君集一酒會亦間有唱和之作尊詩容暇和奉

上月接奉惠書稱廿八日來平弟特於五時率小兒詣青雲閣候至上燈未見駕臨悵然而返前日又奉手示并大著亡室墓誌銘盥薇捧讀不勝銜感肅此申謝並盼台旌

前承賜撰亡室墓誌銘精心結構情文兼至洵是斲輪九京有知當感激無既矣他日墓成勒石尙擬併乞法書俾成完璧一日接大札知將來平頗欲一晤爲快士文佐馥諸君亦欲與台端一醉也自此每日公餘在公園恭候未見駕臨直至十五日書來始知尊體欠安刻下想已霍然令郎將次暑假吾哥必有一度來游惜花事闌珊公

園已無足玩賞但我輩騁懷祇求一樽相對共話滄桑而已酒會各有唱和他日公來容當就教階平兄前隨國聯調查團來平佐馥將赴鄂約一月勾留德良現在湖北財政廳含章兄已回里弟則外交處新成立重入舊巢知注附達

奉八月四日手書翌日即往訪陳毓君未獲晤面再越日前去由其夫人交出我哥書畫便面兩頁展玩一過不勝欽佩書法沉著固不待言老梅一枝出筆蒼勁墨蘭尤極肥潤髣髴昔年魏塘郭宗儀先生所作刻已紈扇秋捐容俟明年愚父子當奉揚仁風也特此道謝弟今年爲人書扇已九十六頁足見酬應開端不易推卻近擬爲亡室運柩又因住房被賣屢促遷移苦無當意階平兄已於上月杪離

平赴瑞士矣

張天放教授手札一

曩在報端見湖南人某論列在京書家先生與曹理丈在焉嘉善人游宦京師出其餘力已足馳譽藝林况其它哉鳳近好隸古文字聞京師原石鼓可搨買乾隆石鼓有舊搨久欲奉函上浼今以寄詩之便希屬意焉

釋慧安手札一

違教日久企念殊深近以敝師圓寂心緒不寧承賜大作遲遲奉答歉愧之至茲特勉和真班門弄斧也幸勿笑是禱

邵伯綱庭長手札一

昨自外歸奉到持贈曝書亭詩詞註十二冊敬領謝謝曾憶廿年前
館梅會里與曝書亭密邇居停姚子祁雅人深致欲修輯曝書亭勝
迹以紕於歛未果僅印詞注數十帙而去忽忽光陰思之悵惘遲日
尙當面謝先此佈臆

施省之督辦手札七

秋間承惠手書心經一軸書法既工道心尤摯盥微敬誦篆竹永銘
猥以冗懶相乘尙稽牋謝歉罪歉罪都門近狀巡防周密雖尙安堵
而阪泉涿鹿戰事方殷烽火瀰漫連城跨郡天未厭亂恤緯滋憂弟
經課如恒愧無悟境幸頑軀尙託平善足慰遠厪

斗杓東指天下皆春展誦惠書欣謠履祉吉祥式符私祝南中革除

舊歷雷勵風行而民間以種種習慣驟經變更深感不便滬上商務
薈萃尤難強勉日來爆竹聲喧依然猶昔小販熙來攘往亦甚形熱
鬧也

弟春申寄跡深苦煩囂移寓海濱聊避溽暑非敢竊比於泉石隱逸
者流祇以性耽佛學此間氣候爽適晨夕靜參禪理頗可蕩滌塵思
書來藻飾有加良用愧感承示津埠地方已臻寧謐不識商務近亦
漸復舊觀否比閱報章知當軸對於裁兵一事進行頗亟果爾則吾
儕小民得以出於水火登諸衽席喜氣日充沴氣自銷縱未必放下
屠刀眞能立地成佛他日因果乘除定不空負此舉也鱗鴻有便尙
望時惠數行

承示津門近况藉悉種切弟海濱伏處強飯如恒入秋後風雨頻仍氣候驟涼至深秋轉形溫暖未識津沽天氣奚若自首都南遷北方市面頓形蕭索轉瞬冬寒又屆失業者多何以卒歲前聞當局者已有鑒及此力謀救濟之方近時想必籌有安輯之法矣

榴紅蒲綠節序更新展誦惠書藉諭公祺懋介式洽頌私弟戢影廬乏善足述爐香經卷聊遣居諸所幸賤體粗綏差可告慰綺注津市蕭瑟固由時勢使然滬上表面雖日益繁華實亦外疆中乾蓋影響所及者廣不獨一隅爲然也

前奉大札俗冗有稽裁會至以爲歉此間入秋以來大雨時降氣候仍甚溫和賤軀及眷屬均頗安適承注謹以奉聞自來因果循環不

爽毫髮每當世變愈亟則因果愈顯報應愈速此彼蒼所以警示愚
頑俾知覺悟正天心仁愛之處其如私利所蔽雖有極顯著之因果
報應而省者殊尠劫數使然曷勝浩歎諸公苦口婆心博徵寶鑑廣
勸戒殺冀以挽回劫運造福民生他日功德正未有涯無任欽遲
久違塵教系念良殷承賜尊公墓誌銘墨拓全份拜領之下敬謹披
誦仰見閣下表揚先德克遂顯親之願孝思不匱世纘清芬曷勝佩
仰弟寂處養疴毫無淑狀邇來賤體託芘粗綏堪紆綺注強隣啟釁
四郊多壘平津一帶已瀕危險之境引領北望烽燧驚心不禁杞憂
之彌切矣

王岫青祕書長手札一

上月徐二先生七十大慶吾兄爲帥座代撰排律一篇祝賀精到之至昨接謝函深致歎賞曰爲傳作非普通壽詩可比徐二先生詩學極有研究故能識曲也後日擷英之叙務請撥冗惠臨不勝跂盼

魏在田大令手札三

憶自都門挹別忽忽晨昏已逾六載辛酉臘尾奉差晉省道經宣南信宿即行未及走晤良用歉然昨承寄示大箸詠物詩草臨風雜誦如對清輝快慰無旣比維道履綏穌至爲馨祝弟自己未之秋分發到浙委榷蕭山繭捐數月畢事以後出差浙東西者十餘次壬戌之秋來此攝篆城在萬山之中地居甌榭衝要民貧土瘠風俗固陋奉職三年無多建樹孔廟荒廢勸捐修建積穀無儲勉爲規復監獄隳

敗遷地新建并置消防器具以禦裁剏造濟生船隻以備水會攷小學畢業已經五次自理民刑詞訟結數百起嬰堂增益基金警察設立分所可相告者如是而已又地方雖屬偏隅人物于焉薈萃省長夏公警務處長葉公水警廳長徐公皆青田籍也其在軍警界爲官長更難指數省會議員多至五人可謂極一時之盛者矣頭腦衆多應付綦難區區民備何以堪此至于缺况列在三等費絀俸微外無餘瀆支銷不給竭蹶時虞惟以上峯眷念梓鄉不欲屢更公僕謀者視爲畏涂不敢輕于嘗試得容不才依舊戀棧思遷匪易欲罷不能株兔何期淵魚徒羨盖亦幸而不幸耳執事職務是否仍舊佳况何如尙希見告茲寄上印石十雙近時之佳質也雅人賞對頑石殊難

點頭請姑存之

上月接讀惠書備悉佳况大作四冊隔日寄到此間殊少同調容將
攜至省城擇所好者代爲轉致瀛眷何年入都比年以來中樞解紐
舉國紛紜前年四省攻浙之時此間幾遭兵禍幸濟寧速去迅告蘇
平否則下走早不知被逐何往矣至今痛定之思猶覺不寒而慄也
然在此已逾三歲成績固無可僂囊橐亦少餘蓄顛顛塵勞公私無
補未免青山笑我白髮欺人奈之何邪何日卸肩或再作宣南之游
耳到此以來舊學益荒去冬今春偶作詩詞亦僅數紙近更自理訟
案日爲鄉愚解雀鼠之爭對姦宄見風霜之面雖多訊結而煩苦極
矣雅人聞之可堪一歎

昨接惠書并賜和佳什敬拜讀悉弟七月八日交卸青篆十日起程十四日抵永中元後一日接事署務奇繁半月以來畧爲就緒此間婺樞衝涂司法方面承審員二書記員八日無暇畧行政方面四科專設主任助理共十餘人額定經費無多殊不敷用此弟之自己喫虧于地方或稍有益也塵俗煩勞胸衷紛亂雅興都消尊作強和一首歌不成腔還希斧政郁君徵詠此時無暇著筆稍緩報命拙稿上仙壇吏隱一印到此新製蓋城西二里有名仙壇之古迹也鑄者邑人應君仲華尙不俗弱

諸季遲同年手札二十七

連日因事乞假昨晨始赴公所獲展大札並讀佳章峻秀絕倫欽佩

無似次韻奉和藉作訂交之券別紙錄塵尙希惠教新歷元日茶會
謹當趨赴會者幾人便中能以詳單見示尤所感歧

喬如公使見兄書畫至爲愛慕屬弟介求用特奉達外附紙件請照
簽粘所欲得者賜以椽筆並盼速藻同深感企岳公使與兄同郡知
必樂爲灑翰也

日前面致救世新教教義及嚴正社社規各件計邀詳覽扶鸞之學
由來已久但能出以誠心正意實足借以宣傳仙佛救世之婆心弟
從事數月誠恒無倦神人契洽之間親逾師友樂數晨夕有非言語
所能形容者披讀尊箸彀觥紀聞一編知極深信因果則於靈文神
筆亦必不致懷疑老同年如惠然肯來請於上元日正午時臨社敬

求同隸玉壇共宣新教自度度人功德甚宏社中頗乏賢能爲助急於難致羣材而又嚴於擇友老同年品高學粹夙所欽佩用敢殷殷奉邀正如遠公蓮社之約周雷諸賢此中大有因緣老同年能匡吾道乎今之人心陷溺極矣非尊宗教無以挽此末劫仙佛旣因機顯示當有萬善同歸之日老同年入社後時相過從即可洞悉究竟也新正晤教良抃良抃栩人不慊二我其說甚是日前有詩以紀此事可爲風雅中添一公案敘文頃已抽暇遵囑脫稿並和栩人一詩連同栩人原作一併寄呈鑒正

送上趙鳳侶兄來緘請警閱後務於今日午後一鐘左右前往北城大鼓樓院路北清室內務府旗產辦公處接洽一切該處盼駕至切

幸勿稽也

昨奉手教誦悉一一施督辦事略茲就其所知撥冗敘之拉雜而成不覺數紙雖匆遽無文而資料甚富一經椽筆剪裁必成煌煌鉅製尊稿能示我先觀爲快否

纓蘅同年昨有電來約就皖省府祕書意極周摯不容不去准於八日平浦車南下到皖後情形如何當再隨時布達時局未定能否久處正難知也

在平瀕行之前專上一槭度已早達籤掌弟於八日匆匆南下十二晨行抵皖垣晤纓蘅同年介見吳主席頗加以顏色惟局面過狹難於別有發展亦祇暫作回旋孱軀幸尙堪勞足紓錦注北地近事如

何風便極盼惠我數行

大箸詩箋自寫襟抱慨歎無窮書法尤極跌宕之致已什襲珍藏之矣纒兄款弟至厚可望久處兒子兆穆定於舊歷仲冬三日在平授室下月廿日前後請假北旋約作兩旬旬留不審能一圖良晤否鞠如公使扇面條幅已荷賜藻容即轉達走取毓蓀世兄前得小魯介於大勝關糧食管理局去甫匝月而其居停現忽更易欲期蟬聯又費周章纒兄最重文字氣誼來示曾與一讀似會言外之意公果思遷地弟可商及希裁示之

昨奉惠翰重荷注問至爲感佩弟此次旋平實因病後失調氣體益弱不勝筆研之勞迫弗獲已請假北歸藉得靜養纒衡同年待遇至

厚惟其心有餘而力不足欲爲逾格之提挈一時無機可乘專以文字相高良非弟夙心所願是以決然舍去然廿年至交又不便遽爾言辭纓兄亦心知其意於是方請假一方留缺仍在藕斷絲連之中旋平已將匝月醫藥調治眠食較佳而精神迄不能振非有數月休息難以復元尊體較弟健碩平日養氣功深能不爲塵慮牽擾一切以澹定處之天懷豁達且羨且服趙次老公子奉母避地津門切懇栩兄赴津爲之講學固辭未能日內即將前往俟得其津寓住址再當馳告兄又可與之時相過從矣弟戒絕詩文尊作誦竟置之懷袖媿乏吟興以爲陽春白雪之和

廿二日手教奉悉先德年丈大人墓誌銘墨拓一份已由啟元兄交

到嘉言懿行謹當以時展讀奉爲模楷蔭蓀兄去志堅決尊處局面更新自在意中拙見公可處以靜觀能留則姑再周旋吾輩溷身濁世枯槁俛仰亦是末可如何此後行止務望隨時賜示

月前握叙杯酒情濃匆遽分袂感愴曷已過徐時晤及新居停浦兩嶠君意極殷拳伊因事赴鄭州屬弟先行遂轉車而東本月一日傍晚安抵新浦鎮浦君已預爲部署款接甚優獲依良友且住爲佳弟頻年運蹇所如不合此次倘復再有意意外參商吾道窮矣兄能苦持忍訣至所心佩當黽勉奉爲師法也

正作函間由棗礦轉回九月十六日尊函藉審清况至以爲慰弟前過滬晤孫慕老執談極暢省老時已赴大連道暑矣世事益不可爲

吾輩求休不得如何如何珂鄉復苦匪擾尤深慨歎回南之行已確定否如尙未啟旆極盼惠復數言以慰拳拳

前者文從蒞平辱荷惠顧始悉兄已北來適以倖值未歸有失倒屣弗克面罄積懷悵歉無似九月中施七先生爲弟介紹財政部印刷局文牘科長趙館許其兼任辰出西歸由北兵馬司至白紙坊再由白紙坊旋廬往返約四十餘里可謂疲於奔命尙幸東陽雖新學家而舊學亦甚通敏故相處尙洽姑與周旋或因觸他機未可知耳昨荷損書存問並讀賦鐙佳章感甚佩甚弟以時局劇變一時難於成行賤恙幸已平復堪紓愛注附上和作一紙希賜削正

昨奉手牋知省老日內來津極思往返旋聞省老有偕植之公使於

陽歷月杪到平之說則在平守候爲便如確不來平或於三日後同
榻人赴津一游榻人昨日來此勾留三四日即回津也

昨奉惠翰始悉兄曾回平未獲晤談悵何如之承貽息影集詠十一
册拜領無誤益三兄處已轉致一册囑筆謝謝省老昨與蔭公偕旋
津門蔭公在平時談及瀛眷有回南之議已否決定交通情形如何
兄或悉一二並希示我省老此次晤話於弟困狀關注良切深以無
實力相助爲憾特將東單二條房屋借弟暫住舊主情摯豈感激二
字所能概括耶

弟夏末偕眷南旋乘便冀有所遇詎東北變起匆匆返平夙恙淹纏
閉戶養晦晤起元兄知文旆亦因事回南遂闕函候昨奉手翰藉悉

兄已北來起居罄吉抃慰無既承貺書畫便面筆意高潔夙絕塵表
明歲梅炎荷暑之際裝置在手奉揚仁風樂也何如感謝感謝賤况
暫可支持惟漢欵難於以時而至不無仍多青黃不接之慮兼之時
局莫測來日大難身雖得閒而心迄弗寧耳老同年橐筆津門鬱鬱
久處偶爲寒梅寫照孤高之格出於豪端月冷煙荒至可想念栩人
所感正復相同吾輩不合抱此傲骨即令鼎鼎當前而趨炎態拙和
羹之事實有分耶差可賴者松朋竹友堪共歲寒不則終將槁餓窮
愁中矣又牛衣老伴尤是性命相依嫂夫人杵臼操勞過於弟婦此
次病後切宜善爲調攝竹報頻來近體何似良系下懷平市戒嚴未
解安堵如常弟不甚外出頗感孤陋日前曾致栩人一緘未有還音

聞其遷住國民飯店既病且貧何以自拄公餘能一探視否
奉上月十三日環牋并得誦公與栩人倡和之作笙磬同雅各極其
勝至佩至佩弟日溷案牘恒至丁夜更無餘興顧及吟詠生計迫人
強自支持惟有太息栩人處曾致一緘月餘未得回札不審已寓目
否公如與晤請一詢之吾輩日莫涂遠出處都非惡塵四偈未由解
脫且暫苦耐度此殘年而已

春初於秣陵瀕言旋時詳佈一楫當邀寓目返平後起元兄交到
大箸紀夢詩並拜寄懷之什過承揄飾媿弗克當至於書札之美情文
兼茂迥異泛常且感且佩誦至地雖隔而心常通頭已白而情愈摯
兩語直貫肝膈如我欲言循繹至再爲之涕零逢茲惡辰生路四塞

正與老哥處境畧同得過且過聊暫安之陳毓蓀來談及老哥詩酒
娛情頗能自遣天懷高曠尤所悅服因於和章中寫以斯悒別帑錄
上幸存覽焉栩人應孚威祕書首席之聘早於去臘移平寓宣武門
外校場小六條孚威待以殊禮而乏束脩有事則召故在寓日多上
下弦之聚從未廢止益三久回成都謙甫本爲熟友惟彼不常在寓
而稷園散步則時與薜蒼尊囑一節容晤及詢明又至戚鍾慈盦兄
新刊所箸新疆志稿暨詩文集合爲湖濱補讀廬叢刻託弟代爲分
售老哥處如有可以情售之處至多能代銷若干部盼酌示

日前奉到還翰誦悉一一湖濱補讀廬叢刻承賜購二部該價已向
交通平行取得至荷高情緱感無既原書昨託毓蓀世兄覓便帶呈

雅覽舊京往還多年老哥豪邁任俠與弟性情大略相同其自奉儉薄而宴賓之費與贈饋之資毫無恡惜則又弟之所不能及心服之至來示又謂吾輩不因人熱不乞人憐一生不得意在此一生能自立亦在此實爲知己之言

昨由平厲轉到手翰遙荷存注緝感無既弟因親友慫恿勉作南游篤公念舊義隆囑暫在其厲料量私交筆札允於舊歷新年騰一秘書缺專管機要月致薪津四百元且先贈三百元匯平以爲度歲之需優厚至此實爲可感乃鯨氛侵滬國府遷洛篤公與遐菴部長共同進退留弟在甯暫候頃得滬信孫院長在滬設立辦事處爲戰士後方機關篤公幫同遐菴部長主持交通事宜一時別無活動弟留

此甚無聊賴遂決定乘今日平浦車返平一面函陳篤公俟大局稍轉甯滬交通恢復如有事見召仍即來投篤公知我深必諒我也淞滬戰事大有延長之勢吾輩生計多受牽累年嫂夫人清恙久淹令郎事復不順殊代爲眉皺弟之處境略略相同現雖北旋來日究將如何

前由新浦轉到大札就審履候嘉愉至爲拊慰弟得篤臣督辦延譽於外界諸公聘爲鑛業聯合會秘書一月中旬來滬賃定法租界金神父路花園坊房屋眷屬亦即南來布置一切兩月有餘始克粗定職是之由遂稽裁畚甚歉甚歉此間屬弟捉刀者頗不乏人遐菴部長亦託篤老敦促論情誼則萬不可辭論精力則實難分任仍墮文

字劫中命也何言省老不時晤敘神采如昔望七之年而能得此殊
可熹耳東湖處雖彼此迄未通問然時得其近作詩詞塞外窮居都
無好懷筆情之峭則依然也

兒女累多又營嫁事循例分束媿未免俗頃奉手翰渥承嘉貺感荷
無似今歲滬上奇熱秋暑猶厲孱軀幸尙能勉支堪以告慰道履清
健益徵養生之純旣慰且佩中秋前後可獲良晤尤所欣盼

前晤燕孫知大旆南旋往返匆匆過滬未得攀敘悵何如之昨奉手
教承悉一一吾輩老朽在此時代尙各有尺席可煖福己不淺公安
處無恙亦正長厚之所食報周旋中節視弟尤勝非此不可以處季
世七令郎虎兒英俊不慮頭角之不騰上也省老近極矍鑠亦矚問

公代爲致候

昨展手書猥以周甲賤辰遠拜錦屏之賜詞翰俱高情文並茂雖揄之過當而愛之實深浣誦再三感戢靡旣惜奉到逾期未能以供衆賞爰特懸之廡廬客座與張壽民耄耄圖中堂陳伏廬松竹石直幅沈兼策學使及葉遐菴部長兩聯左右輝映蓬華爲之壯色此次貽詩者十餘家以栩人四律與大作爲冠餘子鹿鹿無足數也弟今後將實行還嬰之惜頗覺心胸生氣蓬勃似未來景象尙有可爲耳上月廿八日手翰奉悉大箸盤均十二篇孝標自述讀竟慨然擬卽繼聲牽於俗務婁作婁輟頃始脫稿別昏錄上老同年以豁達處窮愁是爲壽徵至佩學養之純弟亦自覺未必如是而已痴狂之態大

可笑也。栩人時與通問來訊，頗露入關之兆。或當然耳。尊稿容當轉寄。日前曾晤省老視前加健，已代候安囑爲答候。

財部盧次長澗泉手札五

曩辱臨存，未聞明教。并荷寵貽書軸，遙錄詩囊，鐵畫銀鈎，未足方其秀勁。金鏘玉戛，詎能喻此高華。二妙所兼，百觀不厭。抗塵走俗，申謝有稽。昨奉瓊琰之章，益愧瓊琚之報。吾兄以過江名士爲入洛才人，使生雍乾極盛之時，得遇阮畢相知之雅，則龍門增價，鵬翼扶搖，傳之藝林，侈爲佳話。今則風塵瀕洞，時局玄黃，抱璞誰珍，摧薪行歎。雖右軍妙筆，莫換於鷺池太傅；工吟不售於雞塞君子。於此竊爲世變憂矣。若弟者，一行作吏，久廢歡歌。中歲治生，更荒翰墨。過承推挹，彌

用主臣

津門別後忽忽經月悵舊雨之難逢望停雲而增感頃奉手教欣審履祺安吉鼎祉延釐遙企芝輝曷勝藻頌弟小住滬濱塵勞栗碌聽秋風之蕭瑟頓觸離懷託鄉思於蓴鱸幸償夙願際此蟾圓時節還憑鯉簡音書

津門小住得圖良晤頓慰積悃頃接來函惠賜字屏四幅發緘展覽風雲吐於行間珠玉生於字裏楷法詩篇並皆佳妙欽佩之餘尤深銘感

闊別經時至深馳系昨承惠貽先德墓誌具徵太邱家法本善貽謀有道碑銘洵無愧色捧讀之餘彌殷景仰執事克承先志備見孝思

引領高風毋任企佩

頃誦手翰辱蒙道賀銘感無似弟忝長幣廠素乏經驗徒以當局期
望之殷社會需要之切不得不勉力擔任迺荷獎飾逾恒彌增惶愧
釋瑞光手札一

承惠法翰謝謝用筆奇古欽佩無已慧師橫幅不日即當寄去容日
走謁

胡文甫院長手札二

久疎通訊想念同深昨日同欽兄轉來惠書辱承存問篆感無既就
審起居萬福懽如所頌春初滬濱劫火各處燬殘聞北尤甚法院距
離戰區較近飽受虛驚日來敵兵雖漸撤退表面似覺平靖然如此

糜爛恐非三五年所能恢復原狀也此間乍晴乍雨氣候因之不正
津地何如諸希珍攝

接奉惠翰藉謫近狀康吉至爲欣慰承示各節同深感荷敵騎橫行
全國震動瞻望前途殊抱杞憂長江一帶目下尙稱平靜知注附達
得閒務希時賜南針以匡不逮幸甚幸甚

錢階平公使手札四

故鄉邂逅歡接塵譚嗣以台從北上道出都門再圖良晤乃候之良
久足音杳然比令郎來甫知業已安旋津沽爲慰小兒等自入學校
中文大爲退步南京又無良師指導爲將來生活計不得不令入校
而中西並進勢所不能祝三家叔現調南京地方法院書記官新近

續娶精神甚佳并達

泰侍奉無狀萱闈見背椎心泣血抱恨終天乃蒙厚賜隆儀無任銜
感昨奉惠書猥以國奢示儉之旨殷殷垂詔具徵愛我以德尤深紉
荷邇來興厝何似側聞執事已有土木之營頗有歸田之志遠道傳
聞未知果否致遠兄前在秣陵曾接塵譚近在杭垣服務賢勞想常
通竹報也弟十年郎署兩袖清風乞食南下重爲馮婦小兒現在金
陵中學大小女在中華女子中學夙荷陶鎔順以奉告

俄行屢辭不獲荏苒一年迄未就道近以先嚴精神眠食已臻康復
命即放心啟程不料行抵哈爾濱遽得先嚴棄養之電星夜奔喪返
浙於五月三日上午抵舍病未侍藥歿未視殮椎心泣血百身莫贖

辱承隆儀遙頒藻翰垂信雲天厚誼歿存均感泰式穀滋慚終天抱
恨素鞞銜恤淚臆頻霑日來先嚴領帖發引大事粗了莫督辦電促
赴俄不得已仍擬勉爲一行不日即須前往知蒙垂注順以附陳
關山間阻馳念爲勞朶雲遙頒睖以佳什浣誦迴環恍親塵教我兄
才華器宇卓爾不羣出其緒餘見之吟詠調高郢楚杜工部傷時之
詩紙貴洛陽李長吉錦囊之作雅人深致企佩良殷弟迹滯海疆心
懷祖國讀執事瀛海長鯨之句不禁爲之起舞也五七兩令郎供職
京曹繼起有人至爲忻慰賤眷去歲同來西京小兒新考牛津地方
考試及格已赴英國里資大學肄業順以附聞

雷艾傭孝兼手札一

廉

早起忽有所觸走筆和公自題小景詩殊不知其爲夔之憐蚊與風之憐目也我公達者或以爲是亦天之倪耳

沈衆議員思齊手札一

奉讀惠書恍若良覲台從前年枉臨值弟在鄉督耕未及倒屣然尊作固獲拜誦穀觶紀聞一書且以之傳布鄰里因而持食牛戒者槁有數人是亦大慈所被也去年銘老以韋君詩草見商見尊簽甚佩之惜慳於薛蒼緣耳惠賜佳章並示兩律置之中晚唐集不辯楮葉非陸劍南所可望也居憂禮不得作詩闕於奉和謹什襲藏之草復不盡縷縷

周亮才參事手札二

三月八日手書奉悉仲兄前在平時與弟談及七令郎曾極贊其人品之篤實名父之子究屬不凡茲承台囑自當代達一切附上致許次長一函即煩於竹報中寄交五令郎轉投爲荷山谷南行弟在此留守雖事務並不甚繁而職守攸關亦未便擅自他適故津行每有此意而不果也

承示序文詞旨並臻佳妙王仲宣眺望樓頭關山夜月杜少陵書懷旅邸天地沙鷗尤爲神來之筆展誦不忍釋手撫今思古爲之慨然芷畦於丁卯年在滬曾晤一面此後即不知其高隱何處弟治易多年未有所獲星命之學僅涉藩籬深信陰陽五行之不可廢也大道不明亂靡有定顧瞻前路彌感艱危仲秉二兄當遵致聲

張伯苓校長手札一

頃接惠函辱蒙對敝校所植菊花於觀賞後並作長歌以爲獎譽花
如有知真覺莫名榮感茲除將尊詠珍藏用垂紀念外特檢所攝菊
影八張隨函奉贈即希哂存爲荷

盛適齋主政手札一

昨讀大作五體投地勉和王字韻一律即希郢政春明人海舍名利
而競詩句行自笑也

顧友笙同年手札五

隔昨接奉瑤章并惠以無題詩一首意在言外佩服佩服茲寄上拙
作無當萬一不堪爲方家笑也霆哥迄今仍無回信又附寸楫敬乞

速轉

前奉覆函並望東北一律嗣又接到息影集詠一冊歡喜無量閣下清才碩望惜不得其時曷勝慨歎拙箸懺綺樓詩集既蒙不棄賞以大序感激萬分我公謂存東樓處惜弟未遇其人抑弟忘記尙祈惠我好音以免遺失公又謂請霆兄飭鈔副本送國聞周刊社先行採錄弟固所願也請如命照辦但霆兄事忙能否迅速從事未可必耳弟一病至今如聾如瞶附上駢體文並雜作數篇幸勿哂之仍祈擲還緣弟小楷不能書也閣下擅詩書畫三長可否繪一梅花俾供清玩

兩接覆函並息園咏物一冊敬悉一是拙箸已經收到頗爲心慰弟

學業尙淺以視閣下之槃槃大才相去不可道里計聞霆兄現在避
難出平此信不知確否邊事日棘危及平津大好山河未知鹿死誰
手杞人之憂徒喚奈何霆兄事忙仰蒙函催速鈔並蒙將拙箸駢體
等文由閣下選擇幾篇感篆何似法繪一梅花雖不要緊然弟望閣
下之心切矣文人筆墨都是心血如何能輕棄之又息影集詠除閣
下原唱已無擬議外其中以杭縣諸以仁君爲第一唐嘯登業師爲
第二同年徐萬石君爲第三松江高天梅君爲第四閣下以爲然否
尊箸息園咏物字字珠璣吾不及也欽仰無似閣下尙有燕夢草能
否見示予實望之天梅原住張堰弟亦舊相識不知現居何處閣下
能否探聽便中所示

頃奉復書並見和佳什并錄舊作三章不獨斐然可觀行且出人頭地佩服佩服而其出色者以黃蘖對白蓮設想之奇非過來人不能道其隻字承和頭頭是道不過讓君先見早歸鄉一句弟殘廢之身有何高見與人爭飯碗問之方家當亦莞爾也茲呈上拙作三首無當萬一請高明斧政懣綺樓詩稿第一冊已收到

昨奉復函距躍三百併惠以菊花長歌一篇通篇無疵而尤其出色當行者當以濁世依然挺秀姿抱璞完貞愈堅卓一聯弟當五體投地矣前有江南送客一首荷蒙採錄慚愧尤深駢體文亦已收到懣綺樓詩稿下冊千乞台端向霆哥處一查是所至禱

李楚材孝廉手札一

自秋祭時辟雍邂逅忽忽又見葭飛渴念之深未容筆罄前由頑齋
交來尊稿兩本奉讀數過敬佩無似近見報載天津狀況令人驚駭
不識台從旅邸動靜若何危險相憶時致不能成寐拙作兩帑附塵
並希指教尤乞時惠好音

葛仲勛監督手札三

辱承枉存以俗冗失迓不勝悵惘奉讀琅函藻飾逾恒殊增慙汗弟
忝縮榷符接收既久局中職員經幾多困難纔算分配妥定蒙薦徐
君一時實無法位置重以尊屬稍緩自當相機設法以圖報命敬乞
原鑒爲荷

南中于役日昨始返知承枉顧未克接談甚爲歉悵承賜墨寶光增

蓬華無任感謝猷征塵甫浣俗冗紛集值此炎威逼人殊以爲苦也
承屢惠多珍於揚風縱目之餘塵襟胥滌豁我胸懷佛像尤古雅感
激無似頃奉手教祇悉涼燠得宣興居佳勝爲頌爲慰芝年世兄英
俊勤慎正資臂助生子當如孫仲謀殊爲欣羨不置可無勞吾老遠
系惟荆棘之地不足以棲鸞鳳未免有屈耳

呂瑚生明府手札一

初春快聚厚擾郇厨尙未肅函致謝迺承華翰先施莊誦迴環莫名
忻忭芝年世兄少年英俊正宜及時努力前途此間督察專署無可
發展既承葛司長迭次電邀萬無推卻之理已於上星期日首塗道
出津門趨庭面稟一切辰下計安抵甯垣矣台從何日來平務乞先

時示知以便歡迎相晤匪遙不盡縷縷

金籛孫太守手札四

昨承賜讀息園詠物詩全冊辭近指遠忼慨而出以悱惻至爲深佩
譚埽庵先生當明季所聞見皆多不平託物爲喻以寫其鬱勃志
賢有新刻本兄必見之今兄所作與前賢同揆矣並傳無疑

去秋道出津沽得親教益復荷賜書存問感篆良深比維履候勝常
鬯芳旁布至如遙企弟歸後閉門補讀頑軀幸告無恙兒輩皆在上
海服務亦時來視之碌碌無足仰慰注存舊都朋友好理老音問較
多近乃月餘未得其來書比晤錢鉢郭兄言理老世兄此次舊病大
發後知識似不如前理老病中心緒愈惡甚可念也吾兄近嘗晤見

否沾上風景自當不減疇昔客有自燕臺至者言亦不致遽形蕭索
南中諸事度兄已見報端家居不與外事似亦尙可墊處田賦有加
無已而收租則日益不易減收尙可逋欠無法催追最爲束手將來
必求減收而不可得已錢銘老在滬在禾兩次見之矍鑠如昔昨往
蘇訪晤循老正發喘病雖言談行步一如平時精神不及銘老多矣
別來遂久敬承台候遙頌勝常客冬見示詠物二十律體物瀏亮託
興深微衍石先生刻楮集中有和廉江先生詠物七言律弟向所誦
習尊作遙與頡頏無任佩仰弟里居碌碌雖欲閉門補讀炳燭滋愧
去冬旬承家兄以微疾遽逝詣郡爲料檢天寒歲晏憂生念逝如何
可言公歲中南歸否魏唐咫尺如公還里幸相聞當詣訪也冬令多

雪氣候奇寒今歲倘能豐收差慰農望鄉里似無事然枹鼓頻警租穀銳減家居忽忽無復好懷

賜題小影長篇揮灑神味直逼古人曷勝欽佩惟以下里巴人辱荷獎借殊使謏劣內媿不敢承耳理老亦有題詩並親爲寫寄病腕雖不甚流利然貞疾六年能大有起色是真不可多得之事極爲可喜弟去歲亦多病秋冬間脈象忽見歇至舍姪本留學德國習鑿乃專用西法治之頗能見效近數月未見此象飲食亦稍加但因此不敢多用腦力往往閉戶兀坐枯木死灰中得稍生氣蒙念輒以縷及

朱秋農同年手札二

奉賜和章廻環雜誦感佩無量三家弟又寄到大箸仁言藹如文更

可傳讀其書想見爲人益令我慕藺不置矣弟蝮伏鄉關濫厠財署
疇昔少壯尙不如人老已至矣更何善之足陳環境無一足以娛樂
惟賤軀尙能勉自撐拄戰勝憂患耳心劣事冗近少題詠容日再當
錄稿求教康舍弟備承盼睐極紉高誼大駕錦旋極思一圖良晤想
表同情也

三家弟滬上書來附到大撰先大夫志銘掾筆鴻文足光家乘不特
子孫之寶兼增泉壤之榮勒石埋幽歿存均感弟等未伸陔養久負
庭聞表瀧岡之阡空揮淚墨抱臯魚之痛徒有悲號幸叨錫類之推
恩庶附立言以不朽傳之後世千秋留華表之褒敢告山靈片石護
貞珉之壽

陳太傅手札一

厚貺謝謝比以風雲起伏心緒不寧先德墓誌銘屢擬握管而屢以
事擱稍緩時日當有以報命仁弟守貞抱璞不慕榮利洵爲難得兄
中秋節後可還津也

許同欽庭長手札一

頃奉華章如獲珍寶拜讀之餘祇悉康泰如常曷勝欣慰吾哥訂海
外文字之交仰見德高學富雅聲遠揚尤爲敬慕弟自法院退職從
事律師依舊紛煩精神不夠明歲擬諸事謝絕閉門養息但時勢所
迫恐難如願胡文甫老師已離滬院先調山東高等法院首席檢察
官因路遠不去後調任鎮江地方法院院長業已赴任矣鉢鄂兄仍


上海地方法院任刑庭庭長近亦少見晤時當代致意吾哥何時南旋深以爲盼

陸平之同年手札一

滬變猝起弟避地於禾又由禾而杭而諸暨嗣以舊疾復發仍還杭寓閉門靜養昨由小兒郵到惠書並大作一律奉誦之下極承垂注感謝曷盡謹依韻勉和一首至希哂政筆墨久荒隨意塗鴉可笑老同年閱之當憐其老態龍鍾恕其不莊矣

錢自治委員絳年手札一

前奉華翰附下除虫護稻法拜閱之餘具見先生關懷桑梓無任欽佩當即送交區公所請治螟研究會諸君參考矣吾邑田稻本年因



發現螟虫收穫較去年減少大概每畝至多二石兼以米價低落每石最高五元數角是以農村經濟幾於破產田主收租大受影響浙省自二五減租以來賦稅逐漸加重現在每田一畝湏完一元五角之譜尙加附稅追繳甚嚴不得延欠因之業佃交困即各種商業亦漸見衰敗時局如斯正不知何時轉機也

王藹丞同年手札一

接誦惠書辱承關念至深感劬弟現充官產總處秘書忽已兩年昨處長突遞辭呈恐不免受連帶影響小女出閣承賜喜聯揭去紅箋得以常懸座右感謝不盡

曹君儒明經手札二

十日奉到惠札敬悉種種公題籤翁梧下定詩圖小影詩曾載益世報詩詞周刊中弟先已拜讀其風格之適上氣魄之沈雄迴越恒蹊佩倒無既今承錄示當什襲藏之理姪所題兩章遵屬錄呈渠謂病體不耐苦思率爾作此不足言詩也墓誌石理姪亦不知以若干尺寸爲適宜公可向刻碑店問之弟終日伏案鈔書殊少暇晷三海公園今夏未曾涉足亦實無游興也

一月廿八日賜示直至昨日奉到正及三句誦悉一一貴處沈家灣新塋據夢翁說係癸山丁向在九南區小收圩日後當爲繪一圖交由少章兄轉寄云云五世兄返里後曾來舍間一談宸擬過舊歷正月北上但不知至時滬變已否平定車路能否通行也

周梅庵教授手札一

秋間台從歸里暢敘甚樂嗣奉津門寄到惠書并承示南來所作各詩用情真摯風骨又復高騫欽佩曷已弟近少所作里中詩事頗感岑寂荀叔姻丈近有七十述懷二律弟曾和二首另昏錄呈乞教政爲幸天方兄送來印就盤字韻詩十章另封由郵寄上至祈督覽節侯兄養痾滬上聞係肺疾但彼環境尙佳安心靜養當可日臻健康耳公餘有暇尙祈時賜數行以當晤談

錢祝三局長手札一

日前奉惠函並好詩拜讀數過如食橄欖味清而永留舌本欽佩無已雨雪飛箋頻速客風塵易轍早辭官一聯豪爽而仍帶含蓄令人

誦不輒口茲謹步韻奉和另帑錄呈小婿王季荃在中行服務甚願
識荆託弟介紹吾鄉昔有盤字韻唱和七律係灘壇寬看盤諸韻順
盤倒盤各作一首張天方十年述事疊順逆十首弟曾和之並函請
伊補寄我兄一份遲早定可寄奉也弟晚年好佛萬事觀空惟對於
一家生計猶未免躊躇耳

吳士翹同年手札一

前次文從戾止得親光霽快慰平生及轉旆回津適以會議所羈致
失承教悵惘奚似弟傭書京國自慙譎陋輒感無聊科務繁時尤覺
竭蹶幸致遠兄相助爲理得免隕越公私感佩先生著作等身夙深
景仰佇讀新詩有如饑渴極盼速賜準備盥薇此間府主奉長法曹

以陳副委員長升繼其任近日正在交替間會中組織據一般觀察似可不至有大更動知關錦注便以附聞

張栩人運使手札二十六

昨日星期候駕不至悵甚悵甚崇實學會本是冷中趣事承公贊許感不可言弟尚有微意不獲面譚故再奉陳者此會發生月餘而應者寥寥明是與潮流背馳之事孰肯自窒其前修待人而興亦無足怪不過我輩持之甚堅鏗而不舍者言之有故不可不於此潮流奮迅中發布顯示於人使知我輩畢竟所持何物不可不先立此一種人格此無論會之能成與否而不能不先博有心者之同情以免事後不過效人搖旗吶喊而已便無價值可言此鄙意之主旨也再大

倫不能完全則一切禮教無從說起天時人事互相印證變局必不甚遠甚願學會之說能佔先幾則我輩所望者或尙可親身見之故託公送老陳一本亦此意也再弟對於此事後載辦法十八條煞具精心結撰第一不希望有財力者之助我因腦滿腸肥者決不足以語此語之彼亦決不肯第二不借大人先生作發起人彼只有政治罪惡而並無勢力可以供學會之利用反使人疑我爲有何等作用此二點頗自覺得意諒兄有心人亦必以爲然也茲送上會章十本希望兄當一組凡老友中之可與言者不妨隨手宣揚來與不來暫不計也

前日承枉顧失迓因弟於清和望前由平回津忽患疹疾即時髦所

謂猩紅熱也侵旬病榻而元氣大傷醫云非避風月餘不能出戶目
下正在靜攝熱病早退無傳染之慮下星期休假日公再肯惠來當
飭僕人引入臥內從容一談因積愆正待傾也近日慳一面緣因爲
病沮或雅量能見原桑田謠大箸已得拜讀不勝感慨兄詩興之豪
亦所罕觀傾倒之至

不見又數月矣相去半里距若天壤兄忙我嬾彌可笑也近來詩興
酒興如何念念新詩數章錄奉吟席粗才急景相和而成烏烏之聲
終不能改千勿笑我

奉讀除夕詩乃知未赴平度歲否則早約公來吾家酌屠蘇矣擬明
日六時請惠臨敝宅一談可作小飲因過年酒肴尙有存者足供一

醉也迎年詩鈔就奉教耳

近有友人尼我之行滬遊暫寢猶可與兄覓醉亦足樂也又偶得小詩獨吟太落莫亟錄奉粲東湖寫詩不修邊幅信筆揮灑自鳴得意先生獨不唾棄殆亦有嗜痂癖也感悚之餘還祈指疵

昨日到平即寄一函已青及否周鳴臯兄爲同社至友擬懇兄賜畫扇面并另一面求寫佳作以成三絕瀆清神心感無似

台從蒞津正切懷想適奉朶雲辱勞見枉不遇益思雅度無任馳系前承贈畫一枝偶有感觸填暗香詞一闋錄俟拍正容暇再圖良晤昨由北平歸來誦手示敬悉季丈處久未寓書因人事上無可說道誼上不可說不欲修寒暄書牘耳元旦詩興到即爲之願公亦勿以

之酬應去年疲於詞調故吟興亦不如平常勿哂爲幸緩當趨話
昨夜枕上戲作春詞八韻繕奉吟席近日東風解凍當益公佳興不
淺容日尙擬約從者一聽黃鸝也貴老師太傅公詩爲海內宗匠便
中何妨以此詩求教或承屬和尤榮幸也

炎燄如焚終日以夢自遣因祇夢境尙有佳者也高軒見過有失倒
屣又兼以偶撻小極幸日得輕減不足慮耳大集奉到翻閱一過神
爲之王幾乎似又入夢矣但王韻不可無詩姑以鈔奉留爲廣雅時
之采擇幸勿疑是飯後鐘也和詩忌趁韻今欲於羣作如林之後求
趁亦復不易祇好率爾成此不值一哂也諸季丈得新居度侯門如
海熱風不復能入亦聊足自娛諒公亦有所聞也稍涼再圖快晤

久懶作詩辱和休頭之韻忽見逃禪者又多一才人不禁爲之讚歎
詩興又如死灰漸有生氣歲云莫矣如此凋年急景尙不容我視陰
數息此豈人情故發憤再疊前韻奉呈一首詩雖無甚意味然今日
能知數典者海內當得幾人故不容我輩藏拙殆亦天實爲之耳
示敬悉連日爲春寒所中精神殊失寧帖桃花笑人殊無謂也尊召
故不敢承俟暇當覓緣一談耳

新從南歸閣下欲知故鄉事否北地早秋紫蟹已肥甚欲邀君一醉
度秋節前後必有暇日也

邨酒香一醉如對公瑾當年極難得也謝謝諸季丈爲細弱逼迫冒
雪遠征人生苦况類皆如此昨日過津只四小時之耽延不及奉候

囑爲致意和公詠物詩歸後又成一首并此呈教餘面談

昨鬯談至快陳太傅愛才古道不圖今日聞之游揚之力殊可慰佩
并承詢及拙箸一節弟閑居小樓中五年所有東塗西抹之作非敢
登大雅之堂聊以自適其適而已茲檢短文二種俱屬原稿既不修
飾亦無書人姑以答辱聽下里者之厚意不敢望恕辭也惟乞閱後
擲還羽毛自珍且更無副本覆瓿亦無須此芟芟者耳併及博笑公
如以爲可見人則希婉致下悃罪甚罪甚再此兩件皆爲弟平日獨
持異議處倘太傅公有頗許意則乞數十字之短序能進言否
示悉另有曾刊印之孝經淺釋茲呈上兩本以一奉教以一轉呈又
論衡之副本一分併奉上乞警收原件俟公閱後交還可也

頃奉朶雲敬悉弟兩月來爲治宿恙迄未出門亦未知兄有遠行也
何時得暇極望把臂一談足資快慰弟近以養痾無事頗注意於倚
聲之學此杭人項蓮生所認爲無益之事也詩卻久不作作亦無當
意者聊以附聞

昨夜立秋今夕覺有微涼度亦心理作用也頃成古風一章殊有風
趣想慧心人必能別具隻眼故亟削櫝以進望勿笑我狂奴故態也
莊子寓言其實皆真實語也閣下以爲寓乎不寓乎莊子又謂在材
不材之間然則斯言亦寓不寓之間耳願公明以告我翹企翹企
惠書敬悉吳公玉泉尋夢圖記年前亦曾爲題七古一首歷劫修持
直至今日鍛羽如故可愧孰甚不宜以夙慧驕人重勉其及早爲計

勿負前修憶當時詩中大意如此稍緩就拙稿中搜尋猶可就正有道也弟閉戶養疴驕陽逼人太甚煩懣之中浩然思歸蓋我輩目下實無所求何必久溷市廛張翰因秋風而思莼鱸良非虛語何況食不必有莼鱸耶俟稍涼宜必有一番斟酌知我者謂爲何如弟近日詞興頗濃長歌當哭可以稍抒胸中骯髒之氣詩則率意爲之不自拘檢故爲數亦夥祇以懶於鈔寫略奉絕句數首聊足快意尙乞教我

我也
昨日忽忽一談頗覺有懷未罄我輩見面時斤斤於破碎文字恍如世外人說蓬瀛清淺聽者不解言者無罪其尙可爲乎詞曲易於移情故君家憶雲謂可遣有涯之生近日頗有所學以非公好未敢上

塵清聽有小詩便錄數首乞即指正聊當巴山夜雨也

昨日弟已全部移回北平到平粗適惟盛暑中作量移之計摒擋一切苦不可言弟將有遠行兩星期必仍道出津沽當可奉訪一談前所託書畫扇面屆時可見惠否又承示朝鮮韓君和鄙韻一首亦復負聲振采不圖秋蛩之吟流至海外實稱奇遇也

不通音敬倏又兩月溽暑苦雨淹淹生氣入秋食瓜過度致患腹疾病僅一來復而精神大受夷傷今尙未能休養元復也季遲姻叔又作皖遊同事相處尙安諒左右當有緘繪也此間又少一人幾乎飽食終日覓一便於噓談之友而不可得十二萬年無此苦也神讖言今秋明月光輝爲人生幾見之佳景弟開簾以待下階而拜吾兄雅

人深致能爲弟遙飛一棧乎此非無聊人強作解頤語也小詩四章
媵函以報

今日由諸季丈轉到惠書拜聆敬悉前次承囑寫近作爲小條幅並
奉題畫梅小詞一首洪喬何須乎此必作塞壁以禦寒風矣琴條不
知是否集作屏幅之用如單行則仍可由弟另寄一張將錄近作詩
詞以進無須寄紙如作屏幅用恐有尺寸則寄紙來再寫奉也

不見忽忽半載麻姑五百年滄桑之感今我輩半年所及見者人事
爲何如耶去秋口人津市之閔敞眷徇外舅之請愬遽赴蘇今春復
以南方兵事愬遽北違北嚮南飛直同飛鳥知我如此不如無生曷
勝浩歎山妻小子惘惘北歸去年棄家而走藜牀鍛竈舍置津沽今

則寄食北平形同旅舍可笑可歎日前因友人約赴天津小住數日
以久久未得起居消息故不克尋訪頃歸讀損書并佳章二首情致
委婉紉繹不置足下匿形養晦靜定之樂爲居斯世最上乘禪弟數
年以來窮居自矢無動機亦無動意不求諒於同學少年遂亦習焉
安之我輩與季丈三人窮雖相似而心迹則迥非一例也所可恨者
去年已得先幾甚願當事人知所預備兄所代致太邱之詩及學會
宣言等等天不愛道甚望有一二人老成謀國者知所做懼荷天之
休詎料彼昏不知褻如充耳寧非天之所廢誰能興之哉可見薄福
之人即聖賢相對耳提面命亦與人事上無微細之補今得兄箋不
覺觸及舊事故恍慊言之兄亦有同情否耶尊什俟暇時當屬諸和

聲以報雅意弟數年來專治宋人填詞之法遂涉及古樂之制頗有
所得乃成樂書數種一爲盛世元音二爲律呂要旨三爲審調便覽
四爲聲調譜五爲清夢樓詞彙都爲十八卷擬俟良緣當印行以公
諸世有涯之生所以遺之者如此足以告我良友也

周公瑾在座如飲醇醪而况虛實兼到快慰爲生平所罕得也生曠
記古潔佩服請商數字以拾遺補闕自任耳大稿奉上即乞檢入容
日再奉約候教

別後次日下午開駛如期抵達一切順適並無阻碍可見人言不可
全信也到此兩日粗得大致情形筆難盡宣所事因主之者已去奉
天須一週方回俟接洽後如何當再奉聞

曹纘衡同年手札三

朔南睽隔裘葛載更馳企之私匪言可喻小魯轉示大札就審吟興
勝常爲頌无量弟籌筆皖江粟鹿無補所幸匪患猶平庶政漸理可
告慰耳季遲尙未來皖聞病狀漸有起色弢師處亦不時肅候尙希
於上謁時代達企忱平津風鶴益念師門起居也

違教經時企懷無似頃奉台翰藉譖動止清佳至慰遠系聽水師靈
櫬何時運閩尙未得悉黔中秋收尙佳秩序亦漸安定華北局勢日
前似可苟安然眷念方來隱憂未已也承惠南行草六册尙未收到
俟奉到後再當細讀

上月廿一日奉復一函計荷管及承惠大箸南行草六册頃始奉到

體遂以古辭清以正諷誦之下佩繹無任容當分贈吟儔以餉同好
九日拙作前經就政刻和者已逾五十人仍擬彙印成刊藉志應求
之雅似不可無大作也比日朔局見聞奚似敝孥尙滯平中至以爲
念便希示及感甚

朝鮮朴多山方伯榮喆手札九

萬里青眼冥投默契附驥酬願足以爲榮矧又寵以大揮仍賜先訊
心心至感無以爲謝伏維秋殘起居住勝從事市隱聊可消受鹽車
困驥千古所恨張維城氏轉任外部聲氣差通時有逢迎風翹企
只覺神逞寄示大著詠物全卷並自壽一頁莊讀數四如入天子明
堂尊罍鼎彝各整其所豈期叔世得此正始游夏輩不敢贊一辭也

曩日寶翰承惠諸人并庸感銘用步自壽原韻以謝萬一茲附呈近刊朝鮮文章大家燕巖朴公全集一帙聊以伴函莞納是希乍寒萬冀爲道自重

惠寄桑田謠及畫梅一幅拜受感佩就中桑田謠二十四首拜讀辭意悽愴不覺汪然沾襟而環顧自身尤不勝同感茂亭葵園惺石蒼史海槎諸先生處所傳詩文與畫依教傳致矣惟希隨時保重

拜讀瓊章音律清雅如聽蘇子之簫不覺牙頰生香並探天涯故人之消息何等感佩綠陰如海懷思彌襟惟希文體以時珍重統冀照亮不具

前月荷蒙惠書兼拜瓊章當即呈謝祇以塵世碌碌之生獲暇無由

未得仰遂寸忱只自悚汗伏維起居錦安臆頌如海生託庇無恙可
慰綺注朔風怒號凍雪栗烈冀加攝衛

頃者惠寄廣寒樓揮毫送傳于南原太守矣即當揭板之意有所答
故胎封仰呈高覽洞亮爲幸天寒木落懷想不已惟祝珍重

郵羽聯翩萬里如咫尺何幸何幸俯惠聯軸謹受掛在座右虹光射
眸匪直筆法可以爲來茲寶藏是係仁人嘉貺何日忘之適啟行東
京忙未能具陳情素倩草略伸感謝之忱統希照亮

神交萬里赫蹠往來如比隣者古人所貴况縱橫字內風雨未霽無
暇汗漫問訊而惟高明不此之拘頻賜德音銘鏤之深罔知攸謝第
審文祺茂膺萬祉尤叶頌言俯惠璠篇擊讀生毛颯颯有古作者聲

韻豈意衰季得見清廟大雅耶謹與敝社諸友輪讀津津而亦將十襲藏篋以作傳世希珍所賜豈直以百朋爲比也時維暑月調護得無爲苦劣筴是敝地所產謹此奉呈以寓坡公便面生風之意也望收置左右不至棄捐則幸甚矣

海闊天長問渺然懷仰正切數度俯賜環雲及諸種圖書拜讀感銘不忘于中謹惟際此籬菊吐芳震艮錦旺咏得幾篇瓊句耶臆頌如海爲探近安且希珍重

自顧愚昧學術淺滯見識謬陋不足爲當世宏學大家記念中物而不自意高明不以是卑鄙引而置之神契之末頻賜德音存問安否又復寵之以詩篇使之興起焉每一奉讀感鑄五內只思所以仰報

者如何爲可而竟未獲焉今者荐承大函忙手披覽乃南行草詩篇數十册也其格韻之邃古辭意之精緻實非如愚者所敢仰贊然諷誦以來自覺心神之爽朗是誰之賜寵荷寵荷餘册當依戒一一轉交社中諸員同謝厚意矣再盛什卷末所捺印章二顆字篆古雅鐫刻精妙入眼愜心賞玩不置切欲仰賴高明獲一珍品字體刻法及石形大小一依貴章樣子而不拘工賃多少千萬仰企只恃厚眷有此煩瀆愧悚無已涵亮至祝

朝鮮朴多山沈玉蘇金鶴田朴也園手札一

郵筒久阻夢轂頻勞即承瀧碑印本一通俯寄者伏感奉覽訖有以知先徽之照映來後可欽可欽當襲藏以作世寶也敢此肅謝藉頌

起居神相區區菲忱鄙作詩什仰呈爲邀大方題品也幸勿撝靳逐
字考評以豁茅簷何感如之第當鵠俟來音鄭萬朝丙朝俞鎮贊諸
氏處所傳一一信交矣

朝鮮韓惺石樞密永源手札三

曩從多山刺史飽聞聲華恒以未接光霽爲歉詎意日者頒到息影
詩卷實感不遐維誦屢回如入波斯之市眩眼奪魄迺知先生平日
蘊蓄在中光華發外也走身縻樞院間或與社友觴詠聊復爾耳餘
何足道偶搜行篋謹將拙著紀行詩一册仰塵清鑒并另呈拙詩自
顧下里巴人有慚陽春白雪統乞郢政

海濶天長景仰日深昨奉郵寄先尊府大人墓銘一幅盥讀屢回始

知有醴有源而芝有根者尤况書體遒勁蒼健欽羨欽羨曩頒到息園詠物一册擊讀再三寓意之深遠竊爲先生不遇而發歎不已茲另錄近作一首須永氏爲日本之文士并有俠氣者故承其意和之也奉賜晒鑒是禱

曩交朴多山奉到塵影集序並生壙記鱗次擊讀尤感不遺之盛意何辭鳴謝稽遲罪甚安望曲恕也冬寒稍劇歲律將暮遙惟文從興居住鬯著作日富潭府清迪引企德輝頌禱萬千走近頗事繁乃國務民計之關係綦重所以每每費慮耳行篋中有枕泉齋記一則錄呈座右奉賜莞鑒並乞郵政草草不盡百一

朝鮮權海槎參議純九手札一

前惠盛集河嶽英靈豈止賸馥幸闕全豹又示長句春容大篇十有二韻如一串珠藻思芊緜燦若雲霞咀諷有味韶護忘肉希風說響敢隸蕪辭矜其謗陋施以篋斧

朝鮮李恥齋祕書丞範世手札三

曩從朴多山轉蒙惠賜息園集詠纔一開卷珠璣迸出時復披詠愛玩不已不知海隅鱗生何以得此中華士君子私切欣幸足慰平生謹步王韻從郵付呈固知俚拙不免貽笑大方亦聊博一粲爲榮耳昨年蒙惠手書並先公墓文及生壙記字字心畫遒勁有法不惟一時珍玩可作傳世之寶仰感盛眷何日忘之顧此踈懶尙未能以一字鳴謝旋切歉悚歲籥重新春熹已盎然矣伏維動止增祉區區詹

頌弟蒲質早衰只覺老醜而已比呈小照麋鹿之姿不足奉溷幸垂
青睞如何拙詩二首并供一粲情長辭短統希心照

曩荷俯和二詩繼蒙書惠一聯人事膠極迄未修謝辜負盛意歉悚
殊深此呈拙書一聯非敢相酬願永以爲好聊供一哂爲幸仍頌起
居以時增旺

朝鮮兪蒼史太守鎮贊手札一

屢蒙親作詩書畫惠寄頃又蒙賜碑文摺本仰認先大人德行感人
與家嗣誠學出常且感盛意之不遐我也茲將拙作墨梅一幅仰呈
愧甚惟希法家哂政

朝鮮鄭茂亭提學萬朝手札一

海天寥濶飛雁遠來承惠息影集詠一冊雙擎拜讀篇篇珠玉耀目
怡神僻在遐陬邀中華士君子之青睞錦什之貽勝於百朋之錫何
以爲報錄呈小詩數章藉申謝意幸垂教焉

朝鮮金桐岡纂修時學手札一

頃蒙遠賜貴重金石碑文一篇奉讀再四足見先生之敦交義而及
遐鄰也此意豈可忘哉竊惟先尊府生平事行已具載本文無敢重
論至若先生之天性純孝久而彌切敢不敬仰臨風拜領殊深感銘
謹構蕪詩一首另備清覽兼乞誨正至以爲荷

日本太倉男爵手札一

閣下代宏農題贈大篇粲然珠玉敬當寶之螺江太傳文章道德中

外咸欽閣下出其門下是以操觚奏曲不同凡響也景仰之下順祝
健康

德國謝禮士教授手札一

由令郎轉贈鏡裝法書法繪墨采飛揚栩栩欲活求之近時不可多得洵爲希世珍貴除託令郎代達謝忱外謹此布臆

大觀

寶賢公長子母姚出幼殤

乃昌字

寶賢公第二子母姚出幼殤

金鏞字

寶林公子母吳出幼殤

關福字

瑞林公長子母沈出行五娶朱氏子一庭楠

敍勳字酉生瑞林公第二子母金出娶郁氏子一庭樹

字貴生瑞閫公長子母胡出娶郁氏子二庭椿庭梅

連陞字貴三瑞閫公第二子母胡出娶沈氏子二庭柏庭榆

金福字 瑞閫公第三子母胡出以兄連陞長子庭柏爲嗣

寅清字襄卿瑞閫公第四子母胡出行八嗣叔瑞高公後娶楊氏子三

庭槐庭桂庭松女一適同邑陶葬父塋


潤身字受福經畚公長子母王出行一娶趙氏繼李氏

潤 字伍冠經畚公第二子母王出行五早殤

潤 字洛觀經畚公第三子母王出行六早殤

潤芳字和尚經畚公第四子母王出行七娶袁氏

潤元字 龍山公長子母錢出行一娶程氏子三敘生義生秋生



潤 字儀干龍山公第二子母錢出行二

杜觀字 四馥公長子母郁出

增福字 四馥公第二子母郁出

老富字 四馥公第三子母郁出

得壽字 四馥公第四子母郁出娶胡氏子一掌生


順福字 嘉生公長子母朱出

六官字 嘉生公第二子母朱出

大冠字 世德公長子母張出

金鎔字 世德公第二子母張出

第三十一代



開文字選樓號少楨乃安長子母孫出行 娶 氏

開章字蔚庭乃安第二子母孫出行 娶 氏

開字字 乃功長子母戚出

開本字 乃功第二子母戚出

開泰字階平乃功第三子母戚出行六娶 氏


開業字既勤乃功第四子母戚出行七

開俊字冠英乃功第五子母戚出

開祥字 乃績長子母蔣出

開禧字 乃績第二子母李出

開 字 乃績第三子母李出



開時字昌期號華平乃斌子生母姚行一浙江省立第二中學校畢業
娶顧氏子一保康

開先字迪初號嶺梅乃賡長子母陳出行二浙江省立第二師範講習
所畢業娶劉氏子二俱殤

開宗字子城號椒庭乃賡第二子母陳出行三本縣縣立第一高小學
校畢業娶陸氏子二書嚴書常書常幼殤

開運字棣通號闔如乃賡第三子母陳出行四本縣張匯鄉時中小學
校畢業聘顧氏

開丕字不言乃琛長子母陳出行二

開汲字公言乃琛第二子母陳出行

開寅字伯明乃徵長子母周出行一


開基字叔賢乃徵第二子母周出

開能字季光乃徵第三子母周出

開騏字調生號壽甫乃登長子母曹出行一生於光緒十八年三月廿九日丑時歿於宣統二年八月廿七日戌時陰娶海陽陳經理少章名朗宜之亡女合葬於沈家灣祖塋

祁兒小傳

祁兒名開騏余長子也秉賦敦敏弱不好弄祖父極愛之鄰里亦深贊之顧多病七歲就外傅從夏師鴻翥庚子余館張氏甲辰館孫氏均隨帶講讀年十三五經卒業學作詩文旁及英算地理歷史頗能



孟晉擬投考嘉興府中學校旋以母病消費益大家計益艱乃輟入
校之議至林亭習典業樸實勤慎爲經理李君所識拔凡事信託已
酉升調閱行典中缺亦爲陳經理所倚爲臂助庚戌春初以積勞得
咯血症還家醫治三月而愈母則臥病依然含淚而別以典務繁重
不能久稽也余又將赴都應試籌措家用及旅資考費勞心勞形亦
彌苦矣家事悉囑梅先二女主持四月十二日偕朱賓初同年由善
首途滬濱小駐渡海而北五月廿六日朝考出場忽接家報祁兒血
症復發在家調理六月六日保和殿覆試以後家報謂咯血已止余
心略寬詎七月中疊報病又轉劇時余未引見欲歸不得惟有函囑
速請名醫診治而已八月中旬事畢急歸廿四日抵家見祁兒與母

隔院而居母憂子病子憂母病而余之憂亦結而不解祁兒病狀雖憊神志極清強作歡容詢余起居余爲述都中之所見所聞彼靜聽之若不勝欣慕曰兒病愈日後隨侍任所常依福蔭如不愈幸未娶親來去無牽掛惟念父母十九年教養深恩絲毫未報則眞抱憾無窮耳廿七日戌時忽滿室清香含笑而逝親朋來送殮者無不惋惜其母思之切夜寐必夢見之至癸丑七兒生而始無夢憶曩時攝篆魏塘與尊翁把酒論文已見嶄然露頭角聞此日歸眞蓬島料轉世負聲振采再來定可紹箕裘

徐寶善拜輓

開駿字

乃登第二子母曹出行三殤

開驥字振霞乃登第三子母曹出行四浙江省立第二中學校三年級
修業生於光緒廿五年三月廿九日酉時歿於民國六年二月廿七
日亥時陰娶同邑沈國學生九品銜佩卿公諱宗珩之亡女合葬於
沈家灣祖塋

昌兒小傳

昌兒名開驥余第四子也清光緒己亥三月二十九日酉時生於善
城之香花坊啼聲宏亮庭角豐滿五歲識字千餘六歲就外傳九歲
余絜之至孫氏塾親教之學作詩文後入縣立第一高小學校畢業
考入浙江第二中校學業大進繼以家境艱難余又驅飢北走不得
已棄儒服賈習錢莊業暇即攻書以不克卒學爲憾時形憤鬱乙卯

秋瘧作還家三閱月始愈元氣未復速到莊奔走勞頓每晚脚虛腫
氣升面赤翌年丙辰三月朔蚤起眼胞微腫逐日腫勢加增遂至頭
大如斗余適歸自燕訊中醫說各不一訊西醫謂傷腰乃送禾中福
音醫院住二旬頭腫漸退而轉入下部腹如鼓腿如筒腎囊如晶燈
又三旬皮起縐紋病減十之七西醫謂如此還家依法調治當無妨
碍詎越十餘日忽又腫上適青浦吳業韓名醫至善乃邀診內服藥
外用摩擦法始稍效小便略通往浦復診舟還過范俞蕩突遇盜比
夜歸家精神疲憊臥牀不起由是百計醫治攻補兩難天益熱皮膚
潰裂水濕下注膩如油藥進輒吐納穀益呆入秋陶莊某醫餌以祕
藥大泄肉消盡祇賸皮骨腹仍隆然殆哉岌岌九月上旬余疊接緊

信又歸自燕明知不治而余親治之小便漸通歷三十餘日腹腫盡退復延中西醫一診謂此轉機之佳兆也小心調養諒無意外之虞飲食漸增精神漸復臘去春來之候肌膚如雪步履亦輕戚友來視者均喜日起有功也不料猝變竟歿於丁巳二月二十七日亥時年十九歲余得電耗再遄歸細訊變兆家人歷述之謂當在病中每歎已讀之書暨英算各科學不習將忘雖極沉重索觀報紙病愈復留心醫理相術且好講放生泛論禪旨恒以遲婚爲請思山居以避塵囂仲春以來屢與母言欲往庵中二十六晚頭暈和衣臥片晌起語人曰明日不欲食至翌午嘔瀉各一次醫診無病晚八九時色漸異中西醫至脉已微十一時自下床解解畢上氣喘腰痛少頃跌踟危

坐閉目不語問之答云甚適甚逍遙再問之已逝矣閏月一日距縣三十餘里之金澤有東嶽廟神附巫者言曰嘉善項振霞四爺已還山供職寄語他父母不必感傷云云金友喧傳特來探告余未敢深信但憶去歲教弟歌其辭曰處濁世兮余不樂瞻四方兮安所適駕崆峒兮遨遊舍冥漠兮偃息余初不措意以爲校歌也豈知其爲讖歌也今執其象而推之儻所謂三生石上有前因者非耶爰爲之傳

沈景誠輓詩二章

儒林商界太勞形况復旁參相與星長吉多才驚碧落維摩善病誦黃庭彌天荊棘人都淚絕世瓊瑰帝不齡一念老親宦京國牀頭寂坐目難瞑

面滿肌豐似勝前病魔擺脫已經年就將苓朮滋培本偏與椿萱斷
絕緣一去便登無上界萬般都付奈何天弔生哭死傷心事且看階
庭玉樹聯

顧思溫輓歌一篇

怪余白眼向羣士世濁無復佳公子久聞項橐是同鄉未見君面及
君死君之尊人我故人昔年一見稱同心才高不受公卿惜老向長
安就苦吟方欣洗馬人如璧差勝山陰屋滿金君也承歡心獨苦早
識儒冠氣難吐負荷思興異道軍學成慕作河東賈男兒不入要當
出我曹矻矻眞何補但使多財舞袖長陶朱三富原豪舉再拜辭親
道路咨端木聯騎結駟時大姓欽名思嫁女里翁馨動苦答兒如此

芝蘭正芬馥何圖風雨摧殘速僕也傷時憤世人嗟夫嗣祖庸非福
 君家本是書種子先代勳名鼎鐘族聞君日夕羽鳩司閉簾猶自抽
 書讀設使生時遭盛明薪樵蔚起鏘金玉斯人豈是五湖長及時早
 看摩天鵠下方難着玉堂仙憤入他塗總可憐固知圭璧塵中墮何
 似鈞韶帝所旋我友聞之笑相向子言信矣如知狀前月桑田神語
 傳一城聞遍驚為創青蓮生是星君謫曼卿死為仙官曠

金澤鎮東嶽廟有巫言項家郎

君已回泰山供職神命我語其家人勿再悲悼時傳為異

本來伯季稱三珠一摘再摘方悲愴

君有長兄先君歿歿年相若

今看胡奮亦奚恨生男原在九天上

開騮字致遠後以字名乃登第三子母曹出行五北京速記學校畢業
 北京新華大學校銀行課優等畢業政治善後討論委員會調查員

國務院印鑄局主事上任事外交部情報司書記官旋升科員浙江
省政府咨調派充秘書處宣傳股領股科員後回任外交部科員考
試院考選委員會調派秘書處普試股主任科員高等考試典試委
員會試場事務股股長代理會計主任高等考試第一試事務處文
書股副股長記功三次娶同邑陸國學生州同銜若愚公諱陳書之
長女儀珍高小學校畢業生子 棣生善生魏生甯生

開驥字相孫號芝年乃登第四子母曹出行七北平輔仁大學校文科
英文系優等畢業內政部總務司科員兼代警政司科員文定雲南
省祥雲縣清道光甲午舉人呂介臣公諱鳴和之曾孫女庚午舉人
癸未進士部選河南盧氏縣知縣調補太康縣知縣湘農公諱炎律

之孫女試署直隸河間縣知事署理京兆安次縣知事調署寶坻縣知事瑚生名鴻綬之長女式琬北平貝滿女子高中學校肄業

庭楠字芷洲關福子母朱出行一娶胡氏子二尙忠尙友

庭樹字玉林敘勳子母郁出行一以兄子庭楠子尙友嗣


庭椿字佑欽貴生長子母郁出行三娶王氏子五尙德尙賢尙功尙發尙然

庭梅字序隆貴生第二子母郁出

庭柏字佑德連陞長子母沈出行一娶蔣氏子三尙元尙志尙義

庭榆字福昌連陞第二子母沈出行一娶陳氏以兄庭柏子尙志嗣

庭槐字植甫寅清長子母楊出行一邑庠武生娶陸氏女二



庭桂字馨甫寅清第二子母楊出行五娶魏氏子 尙熙尙熊

庭松字筠甫寅清第三子母楊出行七娶奚氏子 尙煦尙照尙燾

叙生字 潤元長子母程出

二觀字 潤元第二子母程出

秋生字 潤元第三子母程出


掌生子 得壽 子母胡出行 娶胡氏子 尙均尙權尙民尙公

第三十二代

保康字 開時長子母顧出

書嚴字 開宗長子母陸出

書常字 開宗第二子母陸出幼殤



棣生字範宜致遠長子母陸出行一南京清源高小學校肄業

善生字實齋致遠第二子母陸出行二南京蓮花橋小學校肄業

魏生字通甫致遠第三子母陸出行三蓮花橋小學幼稚園肄業

甯生字季興致遠第四子母陸出行四

尙忠字巧龍庭楠長子母胡出行一娶朱氏


尙友字根榮庭楠第二子母胡出行六

尙德字喜生庭椿長子母王出行二

尙賢字善根庭椿第二子母王出行三

尙功字根生庭椿第三子母王出行五

尙發字根發庭椿第四子母王出行六



尙然字根全庭椿第五子母王出行七

尙元字道士庭柏長子母蔣出行三娶沈氏子 祥松

尙志字道生庭柏第二子母蔣出行四娶 氏子 洪生

尙義字好生庭柏第三子母蔣出行六

尙熙字 庭桂長子母魏出行一娶潘氏子 建華建明


尙熊字 庭桂第二子母魏出

尙煦字 庭松長子母奚出行 娶 氏子 中元

尙照字 庭松第二子母奚出

尙燾字 庭松第三子母奚出

尙均字 掌生長子母胡出



尙權字


掌生第二子母胡出

尙民字

掌生第三子母胡出

尙公字

掌生第四子母胡出



楊家橋西吳佃田內壬山丙向帶子午二分葬十三具

大賓公吳太顧太 星臺公黃太 東園公馬太

鼎臣公胡太謝太周太 襄臣公薛太

又顧佃田內癸山丁向葬十三具

厚齋公 曉山公 雨村公朱太朱太 樂齋公胡太


遜敏公孫太 月如公吳太 鏡淵公顧太

楊家橋東塊艮山坤向葬十三具

維吾公 秋農公 定舟公 一峯公 慶貴公 慎庭公姚太

手成公 鳴和公吳太 三小姑 雲卿公 思廉公

又艮山坤向代葬一具



陳太 (桂山公配)

孫家小木橋南項芷洲田內甲山庚向代葬二具


震方公朱太


又西李桂昌港上丁山癸向代葬二具

容照公周太


楊家浜北代葬一具

秋漁公





東邊 長男調生
 媳陳氏
 東中 石華府君
 陸太淑人
 西中 琴莊與曹氏
 西邊 四男振琴
 媳沈氏
 西下 全貞六女
 生壙也



吾族自宋時評事公晉扈蹕南來枝分葉布日以繁衍嘉興一支人才輩出於明極盛及至嘉善築城則居於善邑者遂爲嘉善籍厥後明社既屋相率而隱半耕半讀兼營商業而仕途中乃無人焉髮亂以後益感衰落先家兄際才恐後世子孫數典忘祖編嘉禾項氏清芬錄及嘉善項氏支譜時復丁遜清鼎革烽火頻驚書甫粗成憂時而歿乃賡等恐其散佚託琴莊四哥校刊但四哥橐筆津沽年亦漸老先將支譜付印俟後退居再行修正夏歷乙亥十一月乃賡乃芬乃琛乃徵全識

